


# PAGSAGOP 1

 . . . maayo ang gibati ko nga madungog kana, maayo gyud kana. Bueno, kanunay gyud, sa gikaingon ko na kanhi, “Nalipay ko sa dihang pag-ingon nila kanako, ‘Mangadto kita sa balay sa Ginoo.’” Nagtoo ko nga si David ang naghimo og ingon nianang pamahayag kaniadto, “Mangadto kita sa balay sa Ginoo.” Wala na ako’y hingsayran pa og unsa man nga mas maayong lugar nga pagaadtoan, mao pud kamo, kay sa balay sa Ginoo.

<sup>2</sup> Karon, niining gabhiona, aduna kita og pipila ka mga higala nga ania dinhi nga gikan pa sa Georgia. Siguro mobiyahe pa sila pagkahuman—pagkahuman sa panihapon karong gabii. Ug dayon atong . . . Ang uban sa ila nga taga-didto pa sa halayo, naglaum ko nga magpabilin pa kamo usá. Ug kung unsa man ang bakanti namo nga mga lawak abli kana para sa inyo.

<sup>3</sup> Ug dayon magpadayon kita sa Miyerkules sa gabii, sa pagtuon, ug dayon, kung itugot sa Ginoo, sa sunod Dominggo na usab.

<sup>4</sup> Ug dayon magsugod na pud sa ika-sais ang sa Chautauqua. Busa kamong mga nakapagplano na sa inyong mga bakasyon, magdahum gyud kita og dakung, maanindot nga panahon didto sa Chautauqua. Didto kita kanunay’ng nagkaaduna og usa gayud ka makahibulongang panahon. Dili pud kaayo daghan nga mga nanagtambong, ang gipahigayon namo didto usahay . . . Mapasigo siguro niini ang mga . . . Sa tan-aw ko mapasigo nato ang napulo ka libo niini, nga sayon ra. Pero, kasagaran, niadtong miaging tuig nagkaaduna kita og mga pito ka libo, mga ingon niana ang kadaghanon. Puno ang lugar, pero maluag pa para makatindog. Ug mga lingkoranan nga mahimo pa nilang iplastar hangtud didto sa gawas. Ug mao nga gilauman nato kana.

<sup>5</sup> Ug nalipay ko nga makita ang ubay-ubay sa atong mga igsoong ministro nga ania karon. Dili ko lang madumduman ang iyang ngalan, ang misyonaryong, si Igsoong Humes ug Igsoong babayeng Humes, ikaw ba kana nga naglingkod dinha, ug ang gagmay nilang mga anak, malipayon kita nga makauban sila, usa ka misyonaryo. Ang uban pud, sila Igsoong Pat, Igsoong Daulton, ug, oh, daghan pa, si Igsoong Beeler. Ug nakita ko pud si Igsoong Collins bag-ohay lang. Ug, oh, medyo malisud nga mahinganlan silang tanan. Pero nalipay gyud kami nga makauban kamo dinhi sa balay sa Ginoo karong gabhiona. Kining si bililhong Igsoong Neville ania siya nagalingkod sa luyo nako aron iampo ako sa diha nga igatudlo nato ang Pulong. Charlie, nalipay ko nga makita ka ug si Igsoong babayeng Nellie dinhi karong gabhiona, uban ang mga bata. Kini maoy . . . ug ang pagtudlo sa Biblia

kasagaran usa ka hilabihang . . . Oo, Igsoong Welch, ako lang . . . nangita gyud ko nimo, og nakita na nako ka nga naglingkod dinha sa luyo karon.

<sup>6</sup> Ang pagtudlo sa Biblia kasagaran medyo peligroso, medyo, kabalo namo, daw sa nagalakaw ka sa nipis nga yelo, ang tawag nato niini. Pero nabati nato nga siguro, niining higayona ug niining orasa, tingali mas maayo nga dalhon ang—ang iglesia nga sa hunahuna ko, ngadto sa usa—usa ka bug-os pagsabot, sa hustong puwesto niini, sa kung unsa kita kang Cristo Jesus. Ug sa hunahuna ko usahay nga ang pagwali usa ka maayong butang, pero nagatoo pud ko usahay, Igsoong Beeler, nga mas lagpas pa niana ang pagtudlo, mora ba kini og . . . ilabina ngadto sa iglesia.

Karon, kasagaran mabingwit sa pagwali ang makasasala, ginadala siya ilalum sa paghukom pinaagi sa Pulong. Pero ginapahiluna sa pagtudlo ang tawo sa puwesto kung unsa siya. Ug dili gayud kita mahimong magkaaduna og hustong pagtoo hangtud nga mahibaloan nato kung unsa gyud ang puwesto nato.

<sup>7</sup> Karon, kung ang Estados Unidos, kung kining atong maayong nasud, ipadala ako didto sa Rusya, ingon nga usa ka ambasadador sa niining nasud, ngadto sa Rusya, dayon kung opisyal nila ako nga gipadala ngadto sa Rusya, nan ang tanang gahum nga aduna ang Estados Unidos nakasuporta kanako. Ang akong pulong pareho ra pud sa Estados Unidos kung giila ako ingon nga ambasadador.

<sup>8</sup> Ug dayon kung gipadala kita sa Dios para mahimong Iyang mga ambasadador, nan ang tanang gahum nga anaa sa Langit, ang tanan-tanan kung unsa ang Dios, ang tanan Niyang mga Anghel ug tanan Niyang gahum magapaluyo sa atong mga pulong kung kita hustong usa ka ordinado, nga pinadala nga mga mensahero ngadto sa mga tawo. Kinahanglan nga ilhon sa Dios ang Pulong, tungod kay balaanon Niyang gisulat, nga “Bisan unsa ma’y imong pagabugkoson sa yuta, kini pagabugkoson Ko sa Langit. Bisan unsa ma’y imong pagaluagan sa yuta, kini pagaluagan Ko sa Langit. Ug Akong igahatag kanimo ang mga yawe sa Ginghamarian.” Oh, kahibulongang mga saad ang gihatag Niya sa iglesia!

<sup>9</sup> Ug ako, human niadtong usa ka adlaw . . . Daghan sa inyo, siguro, ang ania kaganinang buntag para manalinghug sa dihang gipaningkamotan nako, sa mapaubsanon, yanong paagi, nga ipasabot ang—ang panan-awon nga nakita nako mahitungod sa Langit.

<sup>10</sup> Dili gyud nako sulayang duhaduhaan sa unsa mang paagi ang bisan unsa nga gisulti ni kinsa man kanako nga gisulti sa Dios kanila. Toohan nako kana bisan nga wala nako kana makita sa Kasulatan, gusto ko sa gihapon nga toohan ang pulong sa nianang igsoon. Ako—mahimong magpabilin lamang ako sa

Biblia, pero toohan nako sa gihapon nga basin ang maong igsoong lalaki nasayup lang siguro sa pagsabot sa unsa mang paagi, nga siguro medyo naglibog lang siya bahin niini og gamay. Ug toohan nako gihapon nga siya—igsoon ko gihapon siya.

<sup>11</sup> Ug kung may butang man nga nagdilaab sa sulod sa akong kasingkasing, ug nagalaum ako nga dili gayud kini mawala sa mga tuig pa nga moabot, nga dili gayud nako kalimtan ang nahitabo niadtong miaging Dominggo sa buntag, ingon nga usa ka semana. Aduna kini’y gibuhat kanako nga hingpit nga nagbag-o sa akong kinabuhi. Ako—dili na ako mahadlok. Ako—wala na gyud ko’y kahadlok sa kamatayon. Wala gyu’y unsa mang makahahadlok sa kamatayon. Ug kini—dili kini makahahadlok para kanimo kung nakasabot lang ka. Karon, siguro kung . . . Kinahanglan magkaaduna ka og kasinatian para mahibal-an kini, tungod kay wala gyu’y paagi nga maihulagway kini. Wala ka’y makita nga mga pulong, tungod kay wala man kini sa diksyunaryong Ingles, o sa unsang uban pang diksyunayo, tungod kay kini iya man sa Eternidad; wala’y kagahapon, wala’y ugma, tanan pang-karon lang. Ug dili kini nga “maayo man ang akong gibati,” ug usa ka oras gikan karon, “dili man maayo ang akong gibati,” ug usa pa ka oras, “maayo na usab ang gibati ko.” Kanunay’ng pang-karon kini. Kita n’yo? Wala kini kaundangan, kanang pirmi lang gyud og mahimayaong kalinaw, ingon niana.

<sup>12</sup> Ug mahimong magkaaduna og sala, dili mahimong magkaaduna og kasina, dili mahimong magkaaduna og sakit, wala—wala gyu’y mga ingon niana nga makaabot didto sa Langitnong babayon. Ug kung tingali aduna ko og pribilihiyo nga isulti kini, nga, tingali wala ako. Kung wala man, nan nangamuyo ako nga pasayloon ako sa Dios. Pero kung aduna ko’y pribilihiyo, ug kini maoy gikatugotan sa Dios nga sakgawon ako para makita ang usa ka butang, ang ginahisgotan ko mao ang nahaunang Langit. Ug dayon nagatoo ako, nga may usa diha sa Biblia, nga ginganlan og, nagatoo ko nga si Pablo kadto, nga gisakgaw ngadto sa ikatulong Langit. Ug kung ingon niini kamahimayaon sa nahaunang Langit, unsa pa kaha ang anaa sa ikatulong Langit? Mao nga dili ikatingala nga dili si Pablo makasulti bahin niini sulod sa katorse ka tuig! Ang ingon niya dili niya mahibaloan kung anaa ba siya sa lawas niadtong o wala sa lawas. Alang niadtong bantugan nga apostol, dili sa nakigbahin ako sa iyang—iyang—iyang opisina, o dili sa para himoon ang atong mga kaugalingon nga mora og sama kaniya, kondili masulti ko pud pareho niya, nga wala ko mahibalo kung ako anaa ba sa niini nga lawas o wala sa lawas. Ang butang lang nga, ingon gayud kadto ka tinuod sama sa nagalantaw ako kaninyo.

<sup>13</sup> Ug nahunahuna ko na kaniadtong pa ang bahin sa kung moagi ako didto ug duna ko’y makita nga usa ka gamay’ng gabon nga nagalutaw-lutaw, usa ka espiritu, ug moingon ko, “Ah kana si

igsoong lalaki ug igsoong babaye, si Charlie ug Nellie kana. Sila ni Igsoong lalaki ug Igsoong babayeng Spencer kana nga miagi lang.” Dugay nang tanghaga kana para kanako. Kung anaa na sa lubnganan ang akong mga mata, nga nagakatunas na, nagakadugta na, kung wala na ang mga dalunggan ko para makadungog pa, ug kung ang dugo nako nahurot na ug giembalsamar na nila kini, ug kini anaa diha sa katubigan o sa yuta, ug ang akong galamhang pangisip, ang mga selula sa utok nako wala na, nan mamahimong unsa pa diay ko gawas sa usa na lang ka espiritu nga nagalutaw-lutaw sa palibot? Ug nagpabalaka kana kanako. Ang gusto ko maoy kanang masulti ko, “Kumusta, Igsoong Pat, oh, nalipay kaayo ko nga makita ka! Kumusta, Igsoong Neville, daw sa unsa ko ka gustong makita ka!” Pero nahunahuna ko, “Bueno, kung wala ako og unsa man nga magamit aron makakita, o baba man nga magamit aron makasulti, natun-as man kini, abug na man kini, unsaon pa nako pagsulti og, ‘Kumusta, Igsoong Pat,’ ‘Kumusta, Igsoong Neville,’ o uban pa, ‘Kumusta, Charlie?’”

<sup>14</sup> Pero kabalo na ko karon nga sayup diay kadto. Tungod kay nahisulat man diha sa mga Kasulatan, nga masulti nako nga dili kini sukwahi, “Kay kung kining yutan-ong payag matun-as na, adunay usa nga nagapaabot kanato,” usa pa ka bag-ong tabernakulo nga may mga mata, dalunggan, ngabil, galamhang pangisip. “Kung kining yutan-ong payag matun-as na!” Magkaaduna ako’y lawas nga makabati, makasulti.

<sup>15</sup> Ug karon naamgo ko, karon lang gyud, nga namatay si Moises kaniadto ug gibutang siya sa usa ka lubnganan nga wamarkahi sulod sa walo ka gatus ka tuig, ug lima ka gatus ka tuig sa wala pa kadto misaka na sa Langit si Eliseo, pero didto sa Bukid sa Pagkabalhin nakita sila nga nagapakig-istorya kang Jesus.

<sup>16</sup> Sa dili mominus og tulo hangtud sa lima ka tuig kaniadto human nga namatay si Samuel, ug gipatawag siya sa balbal sa Endor, ug miyukbo ang maong balbal, ug miingon, “Naglimbong ka kanako, kay ikaw mao si Saul, mismo.” Ingon siya, “Tungod kay nakakita ako og mga dios!” Usa kini ka pagano, nakita n’yo. “Nakita ko ang mga dios nga minggula.”

<sup>17</sup> Ug sa wala pa makita ni Saul si Samuel, ug ingon niya, “Unsa’y iyang hitsura? Ihulagway siya kanako.”

Miingon, “Niwang siya, ug aduna siya’y manto ibabaw sa iyang abaga.”

<sup>18</sup> Miingon, “Si Samuel kana, ang propeta, dad-a siya sa akong atubangan.” Ug gusto kong himatikdan ninyo nga wala nawala kang Samuel ang bisan unsa man sa iyang kinaiyahan. Propeta sa gihapon siya. Gisultihan niya si Saul kung unsa ang eksaktong mahitabo sa pagkasunod adlaw.

19 Busa, nakita n'yo, ang kamatayon dili bug-os makapakunhod kanato bisan pa kita'y managhilak ug managdanguyngoy ug managbakho sa lubnganan. Ginabag-o lamang niini ang atong puy-anan. Gidala kita niini gikan sa usa ka lugar padulong sa . . . Unsa ba ang edad? Kung mabuhi ako og usa pa ka oras, malabwan ko pa ang kinabuhi sa daghanang mga dise-sais-anyos lang ang edad, malabwan ko pa ang kinabuhi sa mga singko-anyos lang ang edad. Dili importante ang edad. Ginabutang lamang kita dinhi para sa usa ka katuyuan, aron buhaton ang usa ka butang.

20 Bueno, karon, daghan sa niining gagmay'ng maanyag-nawong nga mga inahan ang naglingkod dinhi, ang uban kanila nga saisenta o setenta na ang panuigon, ang magsulti, "Bueno, unsa kaha ang nabuhat ko na, Igsoong Branham?" Napadako ninyo ang inyong mga anak. Nabuhat ninyo kung unsa ang angay ninyong buhaton.

21 Siguro ang uban sa edaran na nga amahan nga naglingkod dinhi, moingon, "Bueno, nagdaro ra ko sa mga uma, *ingon niini* ra nabuhat ko. Wala ko sukad magwali." Pero gibuhat mo lamang kung unsa mismo ang gituyo sa Dios sa imo nga buhaton mo. Aduna gyu'y puwesto para sa imo.

22 Kaistorya nako ang usa ka tiguwang nga doktor, kagahapon, usa sa akong mga higalang doktor, barkada, mga sobra otsenta-anyos na. Ug ang iyang bilas ania nakatambong sa simbahan karong gabhiona, ug siya may diyutay lang, diyutay lang nga kabalaka bahin kaniya. Ug miadto ko para makigkita kaniya. Ug sa nagsugod ko nga makigsulti kaniya, nalipay siya, nagsugilon sa ako bahin sa usa ka biyahe niya sa pagpangayam daghang tuig na ang nangagi didto sa Colorado, ang mismong ilaya nga didto ako gapangayam. Mahait pa ang salabutan ug malipayon! Ug miingon ko, "Doktor, pila na katuig ka nga nanerbisyo?"

23 Ingon niya, "Niadtong ginapasuso ka pa lang." Ug sa kinasuloran ingon ko . . . "Ug daghang higayon," ingon niya, "ginabuhat ko kaniadto ang akong propesyon, nga dala ko ang akong karetela, ginabutang nako ibabaw sa akong kabayo ang akong mga bag nga nakasab-it sa montura. Kuhaon ko ang gamay'ng maleta ug moadto na."

24 Ug ingon ko, "Oo, didto sa ubos nga tampi sa sapa, alas dos sa kaadlawon, gamit ang imong flashlight, naningkamot nga pangitaon ang usa ka balay kon diin didto ang usa ka gamay'ng bata nga nagsakit ang tiyan o kaha usa ka inahan nga nagbati na sa pagpanganak."

"Husto kana."

25 Ug miingon ko, "Kabalo ka, doktor, nagatoo ko, sa tabok niining utlanang linya dinhi, tali sa pagka-mortal ug imortalidad, adunay dapit ang Dios para sa maayong dugay nang mga doktor nga nagserbisyo nga ingon niana."

26 Nagkaaduna og daghang luha sa iyang mga mata ug nagsugod siya sa paghilak, gitunol niya ang maluya niyang mga kamot ug miingon, “Igsoon, gilauman nako.” Sa pikas nga yuta, pagkahukman sa Dios ang kalag sa tawo, kung unsa siya.

27 Dayon gihatag ko sa iya kining makapatagbaw nga Kasulatan. Sa daghang higayon, nga ginadaro mo kadtong mangitngit og malapuk nga uma sa gabii, sa pagpaningkamot nga matabangan ang usa ka tawo, tingali wala ka’y nadawat ni usa ka sentimo para niini, pero okey ra. Miingon ko, “Gisulti ni Jesus diha sa Kasulatan, ‘Bulahan ang mga maloloy-on, kay sila makadawat man og kalooy.’” Ug tinuod kana.

28 Ug karong gabii gusto natong ipahiangay ang iglesia, sa niining tulo ka hilisgutan, kung itugot sa Dios, kung unsaon ug kung unsa ang angay’ng tan-awon, kung unsa kita. Magsugod kita sa unang kapitulo sa Basahon nga sulat ni Pablo sa Mga Taga-Efeso. Ug pagahisgotan nato ang nahaunang tulo ka kapitulo sa atong sunod nga tulo nga pagatun-an, paningkamotan nato nga makahisgot og usa ka kapitulo sa matag gabii, kung mahimo nato. Karong gabii, sa Miyerkules, ug sa sunod Dominggo sa buntag. Mga Taga-Efeso, sa unang kapitulo. Karon sa diha nga atong dungan pagatun-an, gusto nakong isulti kini, nga kining Basahon sa Mga Taga-Efeso hingpit nga sama gayud sa Josue sa Daang Tugon. Mga Taga-Efeso, ang Basahon sa Mga Taga-Efeso.

29 Karon, timan-i, kung mahitabo man nga lahi kini og diyutay, sa inyong pagtulon-an, pasayloa na lang kami ug pasagdi lang sá mi sa kadali. Sa dili pa nato kini ablihan, hangyoon nato Siya nga tabangan kita, samtang iduko nato ang atong mga ulo.

30 Ginoo, nagaduol kami sa Imong balaan ug sagradong Sinulat, nga Kini mao’y labi pa ka sigurado kay sa tanang kalangitan ug yuta. Kay nabasa namo sa niining Pulong, nga gitawag og Biblia, nga “Ang langit ug ang yuta mahanaw man, apan ang Akong Pulong dili gayud mapakyas.” Kung ingon-ana, sa niining mahinuklogong oras nga ania ako niining pulpito karong gabii, atubangan sa mga gipalit sa Imong Dugo, niining bililhong pinangga nga mga mortal nga ania dinhi karong gabii, nga naningkamot nga makagunit sa matag gamay’ng paglaum nga magunitan nila, aron makauban nianang Kahayag nga moabot. Hinaut nga mamahimong igo gyud kini, karong gabhiona, nga makita sa matag magtotoo dinhi ang iyang posisyon, ug ang matag usa nga wala pa nakasulod sa niining halangdong pagpakig-fellowship, magporsigir ngadto sa Ginharian, Ginoo, ug magapanuktok sa pultahan hangtud ablihan sa Tagbantay ang maong pultahan. Itugot kini, Ginoo.

31 Ginabasa namo dinhi kon diin kini nga Biblia dili mahimong hatagan og kinaugalingong paghubad. Dios, ayaw itugot nga ako nga Imong alagad o ang kinsa pa nga ubang alagad

mosulay nga magbutang og kinaugalingon nilang interpretasyon sa Pulong. Basahon lang namo Kini ug toohan Kini, sa paagi nga pagkasulat gyud Niini. Ug ilabina kaming mga magbalantay sa panon, kaming mga pastor nga sa umalabot nga adlaw magakatigum didto nianang mahimayaong Yuta uban ang maong gagmay'ng mga panon, ug magatindog kami diha sa Presensiya ni Ginoong Jesus ug makita kanang henerasyon nga magaduol, ang kang Pablo, ug kang Pedro, ug kang Lucas, ug kang Marcos, ug kang Mateo, ug silang tanan, ug makita sila didto nga pagahukman kauban ang ilang mga grupo. Dios, tugoti nga makapahimutang ako og napulo ka milyon nga mga tropeyo diha sa Imong tiilan samtang ako mapaubsanong nagakamang paduol ug ipatong ang akong kamot sa Imong bililhong tiilan, ug moingon, "Ginoo, mga Imo man sila."

<sup>32</sup> Oh Dios, pun-a na usab kami sa Imong Espiritu, ug sa Imong gugma ug sa Imong pagkamaayo. Ug hinaut nga kami, sama sa gipahayag sa magbabalak diha sa awit sa daghang mga tuig na ang milabay, "Minahal nga himalatyong Cordero, ang Imong hamiling Dugo dili gayud kini mawad-an og gahum, hangtud ang tanang tinubos nga Iglesia sa Dios maluwas aron dili na magpakasala pa. Ug sukad kaniadto, pinaagi sa pagtoo, nakita ko kanang sapa nga ang nagaagay Mong mga samad ang gigikanan niini; ang gugmang nagatubos mao na'y akong tema, ug hangtud na nga ako mamatay. Kung ingon-ana diha sa usa ka mas halangdon, mas matam-is nga awit," nagpadayon siya sa pag-ingon, "Pagaawiton ko ang Imong gahum sa pagluwas; sa diha nga kining luoy'ng yungit, nagkanganga nga dila mipahulay na dinha sa lubnganan." Dayon, wala na'y kamatayon nga mahimong kuptan sa lubnganan para sa Imong mga anak. Usa na lamang kini ka pahulayan, o usa ka tagoanan nga lugar, diin kining may pagkadunot nga lawas magasul-ob sa dili-madunot.

<sup>33</sup> Hinaut nga makita namo kini karong gabhiona, Ginoo, sa yanong paagi, sa diha nga ginahatag kini kanamo sa Pulong. Hatagi kami og panabot. Ug ibutang kami, Ginoo, diha sa among katungdanan, para mag-alagad kami nga matinud-anon hangtud sa Imong pag-abot. Amo kining ginapangamuyo sa Ngalan ni Jesus, ug alang Kaniya. Amen.

<sup>34</sup> Karon, ang Basahon sa Mga Taga-Efeso, sumala sa giingon ko lang, ako...sa akong opinyon, maoy usa sa pinakahalangdong Basahon sa Bag-ong Tugon. Ginadala kita niini, kon diin ang Calvinismo misugod nga mitipas ngadto usa ka sanga, ug kon diin ang Arminianismo misugod usab nga mitipas ngadto sa usa pa ka sanga, pero gihusay kining duha diha sa Basahon sa Efeso ug ginabutang ang Iglesia sa hustong posisyon niini.

<sup>35</sup> Karon, gitipo ko na kini kaniadto sa Josue. Kung namatikdan ninyo, gidala pagawas kaniadto ang Israel gikan sa Egipto, ug

adunay tulo ka hugna ang ilang panaw. Ang usa sa hugna, mao ang pagbiya kaniadto sa Egipto. Ang sunod nga hugna, mao ang kamingawan. Ug ang sunod nga hugna, mao ang Canaan.

<sup>36</sup> Bueno, wala magrepresentar ang Canaan sa kapanahonan sa Milenyum. Nagarepresentar lamang kini sa kapanahonan sa magdadaug, ang dispensasyon sa pagpangdaug, tungod kay sa Canaan gipamatay ug gipangsunog ug gipangsakop nila ang mga siyudad. Ug wala ma'y kamatayon sa Milenyum.

<sup>37</sup> Pero ang usa pa ka butang nga ginabuhat niini, nagdala kini og pagpamatarung pinaagi og pagtoo, pagkahuman nga mitoo sila kang Moises ug mingbiya sa Egipto. Pagpabalaan, ang pagsunod ilalum sa Haligi nga Kalayo ug ang pangbayad-sa-sala nga hinalad nga karnero didto sa kamingawan. Ug dayon ang pagsulod na sa usa ka yuta nga gisaad.

<sup>38</sup> Karon, unsa man ang yutang gisaad para sa magtotoo diha sa Bag-ong Tugon? Ang saad mao ang Balaang Espiritu. “Kay mahitabo sa ulahing mga adlaw,” Joel 2:28, “nga igabubo Ko ang Akong Espiritu ngadto sa tanang unod. Magahimo'g profesiya ang inyong mga anak nga lalake ug ang inyong mga anak nga babaye. Ug ang Akong mga alagad nga mga babaye ug ang Akong sulogoong babaye pagabuboan Ko sa Akong Espiritu, ug sila magapropesiya. Magpakita Ako og mga katingalahan sa itaas diha sa kalangitan. Ug diha sa yuta, mga haliging kalayo, ug aso, ug inalisngaw.” Ug miingon si Pedro, niadtong Adlaw sa Pentecostes, pagkahuman niya nga hisgotan ang iyang teksto ug wali, “Maghinulsol, ang matag usa kaninyo, ug magpabautismo sa Ngalan ni Jesus Cristo alang sa kapasayloan,” aron pasayloon, para mapasaylo, para tangtangan ang tanang mga kalapasan.

<sup>39</sup> Namatikdan ba ninyo, si Josue, sa wala pa nila taboka ang Jordan, miingon si Josue, “Lumakaw kamo sa taliwala sa kampo ug limpyohi ang inyong mga bisti ug magbalaan ang matag usa sa inyo, ug dili moduol ang lalaki sa iyang asawa, tungod kay sulod sa tulo ka adlaw makita ninyo ang himaya sa Dios.” Kita n'yo? Kini maoy usa ka—kini usa ka proseso sa pagpangandam para mapanunod ang saad. Karon, ang saad sa Israel, mao nga, gihatag sa Dios kang Abraham ang saad nga yuta, sa Palestina, ug mamahimo nila kadtong panag-iya hangtud sa kahangturan. Ug kinahanglan nila nga magpabilin sa kanunay sa niining yuta.

<sup>40</sup> Karon, miabot sila sa tulo ka hugna, sa pag-adto nila sa niining yutang saad. Karon matikdi, hingpit kini nga gitipo sa Bag-ong Tugon.

<sup>41</sup> Karon kini, sa giingon ko na, dili-uyon sa pipila ka panghunahuna ninyo. Ang uban sa inyo nga mga bililihong mga miyembro sa Nazarene, Church of God, ug uban pa, ayaw ninyo ikasakit kini, pero tan-awa ninyo kini og ayo ug bantayi ang maong mga pagtipo. Bantayi ug tan-awa kung dili ba gyud kini hingpit nga nagakatakdo sa matag anggulo.



42 Adunay tulo ka hugna ang kadtong panaw, ug aduna mismo'y tulo ka hugna ang maong panaw. Sa hinungdan nga, gimatarung kita tungod sa pagtoo, sa pagtoo kang Ginoong Jesus Cristo, nga ginasalikway ang yuta sa Egipto, nanggula niini. Ug dayon gibalaan tungod sa paghalad Niya sa Iyang Dugo, nga naghugas sa atong mga kasal-anan, ug nahimo kitang mga magpapanaw ug mga lumalangyaw, nga nagapamahayag nga ginapangita nato ang usa ka yuta, usa ka siyudad nga umaabot, o usa ka saad.

43 Ingon niana pud kaniadto ang Israel didto sa kamingawan, mga lumalangyaw, walay lugar nga kapahulayan, nagapanaw matag gabii, ginasundan ang Haligi nga Kalayo, pero sa kaulahian naabot nila ang yutang saad diin sila nanagpuyo na.

44 Sa ingon-nianang paagi nagaduol ang magtotoo. Una nagaduol siya nga ginaila nga siya usa ka makasala; dayon gihimulag siya pinaagi sa mga tubig, ang paghugas sa tubig, pinaagi sa Dugo, ug...o ang paghugas sa tubig pinaagi sa Pulong, diay, nga nagatoo kang Ginoong Jesus Cristo. Dayon, ingon nga gipakamatarung na tungod sa pagtoo, siya nahimong umalambit, ug may pagpakigdait sa Dios, pinaagi kang Cristo, nabautismohan na sa Ngalan ni Jesus Cristo, para iapil na siya ngadto sa panaw. Nasabtan ba ninyo? Giapil na sa panaw! Dayon siya'y nahimo nang lumalangyaw ug magpapanaw. Anaa na siya sa iyang panaw ngadto sa unsa? Ngadto sa saad nga gisaad sa Dios.

45 Wala pa niadto nadawat sa Israel ang saad, pero atua na sila kaniadto sa ilang panaw. Ug dili sa... Palihog sabta ninyo. Dinha kamo, nga mga Nazarene ug mga Pilgrim Holiness, ug uban pa, nahulog. Tungod kay, ang Israel, sa dihang miabot na sila niadtong lugara, didto sa Kadesh-Barnea, sa diha nga naadtoan na kadto sa mga maniniid ug miingon, "Maanindot ang maong yuta," pero namalik ang uban kanila ug miingon, "Dili nato kini maangkon, tungod kay naparilan man ang mga siyudad, ug kung unsa pa." Pero ningtindog sila Josue ug Caleb, ug miingon, "May kasarang mismo kita nga sakupon kini!" Tungod sa ilang mga gipirmahan na daan nga mga dokumentadong mga pamahayag, nanagtoo sila sa duha ra ka mga buhat sa grasya, pagpamatarung ug pagpabalaan, ug dili na hinoon makaabante pa. Ug, paminaw mo, nangamatay mismo kadtong tibukol kaliwatan didto sa kamingawan. Pero duha ra ang nakasulod ngadto sa yutang saad ug nagdala pabalik sa ebidensya nga matambok kadto nga yuta, "ug may kasarang gayud kita nga sakupon kini, tungod kay saad man kini sa Dios." Dayon imbes magpadayon unta ang mga tawo, ngadto sa pagdawat sa Balaang Espiritu, sa pagsulti og ubang mga pinulongan, sa pagdawat og gahum sa Dios, sa bautismo sa Espiritu Santo, sa mga ilhanan, mga katingalahan, mga milagro, gibati hinoon nila nga gubaon niini ang ilang tradisyon sa

doktrina. Ug unsa may nahitabo? Nangamatay sila dito sa yuta! Husto kana.

<sup>46</sup> Pero ang mga magtotoo, ang pundok ni Caleb ug Josue, nga nagpadayon padulong sa yutang saad, mipadayon sila paingon sa maong yuta, ug gisakup ang yuta, ug nagpuyo didto sa yuta, ingon nga ila nang panag-iya. Ug dili gyud kita mohunong sa pagpamatarung, pagpabalaan. Magpadayon mismo kita padulong sa bautismo sa Balaang Espiritu. Dili nga mohunong na lang kita sa pagtoo kang Ginoong Jesus, ingon nga nabautismohan na. Dili gayud kita mohunong tungod lang kay nahinloan na Niya kita gikan sa kinabuhi nga makasasala. Kondili maningkamot kita padulong sa usa ka posisyon, padulong sa saad nga bautismo sa Espiritu Santo. Kay si Pedro miingon, didto sa Adlaw sa Pentecostes, “Kay ang saad alang kaninyo, ug sa inyong mga anak, ug kanila nga atua sa halayo, bisan sa matag usa nga pagatawgon sa Ginoo nga atong Dios.”

<sup>47</sup> Busa, ang Efeso gipahiluna kita dinhi sama kang Josue, sa posisyon. Namatikdan ninyo, si Josue, human sa pagtabok nila paingon sa yuta, ug gisakup ang yuta, gibahinbahin niya dayon ang maong yuta. “Si Ephraim *dinhi*, si Manases pud *dinhi*, ug ang usa niini *dinhi*, si Gad *dinhi*, si Benjamin pud *dinhi*.” Gibahinbahin niya ang yuta.

<sup>48</sup> Ug matikdi! Oh, ginapadilaab mismo niini ang atong mga kasingkasing! Ang matag usa niadtong mga inahang Hebreohanon, sa pagpanganak nila niadtong mga kabataan, gisulti niya ang mismong lugar, sa dihang gibati na niya ang kasakit sa pagpanganak, gisulti niya kon diin ang mamahimong lugar sa iyang mga anak didto sa yutang saad. Oh, pagkaanindot niini tun-an! Kung madetalye lamang nato kini, nga magahinan og daghang oras. Sa umalabot nga adlaw kung maiplastar na nato ang atong simbahan, gusto kong moanhi ug maggahin og tibuok bulan o duha, nga magpabilin lang sa maong hilisgutan. Bantayan n’yo sa dihang sila, ang matag usa niadtong mga inahan, sa dihang misinggit siya og, “Ephraim,” sa dihang nagabatî na siya niadto, ginapahiluna na niya diay kini sa gitakdang luna kung asa ang mga tiil niini matunob sa lana. Eksaktong-eksakto kung asa mismo mapahiluna ang matag usa kanila!

<sup>49</sup> Ug si Josue, nga wala mahibalo niadto, pero tungod sa inspirasyon, ingon nga gipangunahan sa Balaang Espiritu, human nga nakasulod na sa yutang saad, gihatag niya sa matag tawo ang saad para sa maong tawo mismo, eksakto sa kung unsa ang gisaad sa Balaang Espiritu sa diha nga nahitabo ang maong mga pagpanganak kaniadto.

<sup>50</sup> Kung unsa nga gipahimutang sa Dios ang uban sulod sa iglesia, pinaagi sa kasakit sa pagpanganak! Oh, mas

nagakagrabe pa gani kini usahay. Sa dihang nagaagulo ang iglesia ilalum sa pagpanglutos sa mga taga-gawas, nga tungod sa pagtoo nato kang Ginoong Jesus, ang saad sa Espiritu Santo ingon gayud katinuod sa ato kung unsa kini kaniadto sa Pentecostes, kung giunsa nila sa pag-agulo usab kaniadto ug pagtuaw ilalum sa pagbati og kasakit sa pagpanganak! Pero sa dihang naipanganak na sila, ug naipanganak na sa ilang posisyon ngadto sa Gingharian sa Dios, ayha pa nagpahimutang ang Espiritu Santo sulod sa iglesia, nga ang uban mga apostoles, ang uban mga propeta, ang uban mga magtutudlo, ang uban mga pastor, og ang uban mga ebanghelista. Dayon naghatag pud Siya, og mga pagsulti'g laing pinulongan, paghubad sa mga pinulongan, kahibalo, kaalam, mga gasa sa pagpang-ayo, og tanang matang sa mga milagro.

<sup>51</sup> Kung diin ang iglesia maoy. . . Mao kini karon ang akong katuyoan sa pagbuhat niini. Kanunay'ng gipaningkamotan sa iglesia nga ilogon ang puwesto sa uban. Pero ayaw gyud kana buhata. Dili kamo mahimong magtanum og mais sa luna ni Ephraim, kung kamo kang Manases. Kinahanglan ninyong magpahiluna sa puwesto ninyo diha kang Cristo, magpahiluna sa maong posisyon. Oh, nagkahalawom kini ug nagakadagaya pagmahisgotan na nato kini, kung giunsa nga nagabutang ang Dios og usa diha sa iglesia para magsulti'g laing mga pinulongan, ang usa pud. . . Karon, gitudloan kita kaniadto sa daghang higayon nga, “kinahanglan natong tanan nga magsulti'g laing mga pinulongan.” Sayup kana. “Kinahanglan nga buhaton nato kini tanan.” Dili, dili nato kinahanglan. Wala nila tanan nabuhat ang usa ra gani ka butang. Ang matag usa'y. . .

<sup>52</sup> Ang matag usa, gihatag kaniadto ang yuta ug gipangbahinbahin pinaagi sa inspirasyon. Ug, ang matag usa, mahimo nako kuhaon ang maong mga Kasulatan ug ipakita kini kaninyo sa ingon kaeksakto, nga gibutang niya sila sa lugar nga angay nila kapahilunaan, kung asa sila angay, kung unsa nga ang duha nga katunga nga tribo magpahiluna didto tabok sa suba, eksakto kung unsay gituaw sa ilang mga inahan sa diha nga sila'y gihimugso, ug kung unsa nga ang maong matag lugar mamaingon gyud niana.

<sup>53</sup> Ug karon pagkahuman nga nakasulod ka na, wala kana nagapasabot nga wala na kamo'y giyera. Kinahanglan n'yo sa gihapon pakig-awayan ang matag pulgada sa yuta nga inyong gitindogan. Busa, nakita n'yo, ang Canaan wala nagarepresentar sa halangdong Langit, tungod kay giyera man didto ug mga problema ug mga pagpamatay ug mga pagpakig-away, ug uban pa. Pero kini ang ginarepresentar niini, nga kinahanglan mamahimong usa kini ka hingpit nga paglakaw.

<sup>54</sup> Dinha kon diin nagakapakyas ang iglesia karon, sa niana nga paglakaw. Kabalo ba mo nga bisan ang inyong pamatasan makababag mismo gikan sa pagkaayo sa uban? Ang inyong

di-maayong pamatasan, ang dili naitug-an nga mga sala ninyong mga magtotoo, mamahimong hinungdan sa mapait nga pagkapakyas sa niining iglesia. Ug manubag gayud kamo sa matag tipik niini sa Adlaw sa Paghukom. “Oh,” moingon mo, “karon, kadali lang, Igsoong Branham.” Bueno, mao kana ang Kamatuoran. Hunahunaa ninyo kana!

<sup>55</sup> Si Josue, human niyang matabok ang yutang saad, ang Dios naghatag kaniya og saad nga . . . Hunahunaa n’yo na lang, ang makig-away og sunodsunod nga operasyon nga walay pagkalagas og tawo, wala man lang nagarasan, nga wala man lang nagkinahanglan og nars, o mga dinaliang panambal o ni usa ka bandahi. Amen. Ang giingon sa Dios, “Inyo kanang yutaa, adtoi n’yo og pakig-awayi.” Hunahunaa n’yo lang, sunodsunod nga pagpakig-away, ug wala man lang Red Cross sa duol, nga wala ni usa kanila ang masamdan!

<sup>56</sup> Ug gipamatay nila ang mga Amorehanon ug ang mga Hetehanon, pero wala gyud ni usa ang nasamdan taliwala kanila hangtud nga nakasulod sa kampo ang sala. Ug sa dihang gidala ni Acan ang kupo nga iya sa Babilonia ug kadtong sisip nga bulawan, ug gitago ang mga niini sulod sa iyang balongbalong, dayon pagkasunod adlaw nalagasan na sila og disesais ka tawo. Mingon si Josue, “Hunong! Hunong usá! Kadali lang, aduna gyu’y sayup! Aduna gyu’y sayup niini. Magpatawag kita og pito ka adlaw nga pagpuasa. Nag-saad man gud ang Dios kanato nga, ‘Wala’y ni usa ang masamdan kanato.’ Mangapukan mismo ang atong mga kaaway sa atong tiilan. Ug aduna gyu’y sayup niini. Aduna gyu’y butang nga sayup sa kung asa, tungod kay napatyan man kita og disesais ka tawo nga nagbuy-od karon dinhi. Mga igsoon nato silang Israelita, ug patay na sila.”

<sup>57</sup> Nganong nangamatay sila, ang mga inosenteng tawo? Tungod dunay usa ka tawo milapas sa linya. Nakita n’yo ba ang hinungdan kon nganong kinahanglan gyud nga maitudlo kini? Ang iglesia nga nagalinya, nagalinya sa Pulong sa Dios, nagalinya sa Dios ug nagalinya sa usa’g usa, nagalakaw nga hingpit nga matarong, maligdong, atubangan sa tanang tawo, nga may kahadlok sa Dios. Tungod sa usa ka tawo nga nangawat og kupo, ug nagbuhat og usa ka butang nga dili niya angay untang buhaton, gikuha ang kinabuhi sa disesais ka tawo! Sa hunahuna ko disesais kadto, o sobra pa siguro. Nagatoo ko nga disesais ka tawo kadto ang namatay.

<sup>58</sup> Nagtawag si Josue, miingon, “Aduna gyu’y sayup! Nagsaad man ang Dios, ug mao nga duna gyu’y sayup.”

<sup>59</sup> Sa dihang dad-on nato ang mga masakiton sa atong atubangan, ug dili sila mamaayo, kinahanglan nato nga magpatawag og mahinuklogong pagpuasa, magpatawag og tigum. Aduna gyu’y butang nga sayup sa kung asa man. Nagsaad

ang Dios, kinahanglan tumanon sa Dios ang maong saad, ug pagabuhaton gyud Niya kadto.

<sup>60</sup> Ug nagpatawag siya og pagpuasa. Ug nasayran nila, nagparipahan sila. Ug giangkon kini ni Acan. Ug gipatay nila si Acan, lakip ang iyang pamilya ug tanantanan, ug gipangsunog sila hangtud nga mahimong mga abo, ug gibilin kini didto ingon nga pahamatngon. Ug nagpadayon na sila Josue sa mga pagpakig-away, nga ginasakop ang tanan, nga wala’y gasgas o bisan samad man lang. Tan-awa.

<sup>61</sup> Usa niana ka adlaw nanginahanglan siya og gamay’ng oras, dugang oras. Pasalop na niadto ang adlaw, dili makakumbati og pagpakig-away ang mga kalalaken-an sa gabii. Si Josue, ang maisogon nga manggugubat, dinihogan sa Dios, nga gibutang sa posisyon didto sa maong yuta, sama sa mga taga-Efeso sa bag-ong Iglesia, tag-iyá, gitag-iyá, gipanag-iyá ang maong yuta, gisakop kini. Nagkinahanglan siya og dugang gamay’ng oras, busa miingon siya, “Adlaw, humunong ka!” Ug mihunong kini sa mga dose oras, hangtud nga nasakop niya ang maong yuta. Kita n’yo?

<sup>62</sup> Karon ginapahiluna kita sa posisyon diha kang Cristo sa Basahon sa Mga Taga-Efeso, sama sa kung unsa sila kaniadto sa Balaang Yuta. Gipahiluna kita dili sa Balaang Yuta, kondili diha sa Espiritu Santo! Karon magbasa kita og usa ka Pulong lamang, tan-awa ninyo kung unsa ka hingpit ang maong iglesia:

*Si Pablo, nga apostol ni Jesus Cristo pinaagi sa kabubut-on sa Dios, . . .*

<sup>63</sup> Oh, gusto ko kana! Gihimo siya sa Dios nga usa ka apostol. Wala’y mga elder ang nagpandong og mga kamot diha kaniya, wala’y mga obispo ang nagpadala kaniya, kondili ang Dios ang nagtawag kaniya ug naghimo kaniya nga usa ka apostol.

*Si Pablo, nga apostol ni Jesus Cristo pinaagi sa kabubut-on sa Dios, nganha sa mga balaan (kadtong gipangbalaan na) nga anaa sa Efeso, ug kasaligan usab diha kang Jesus Cristo:*

<sup>64</sup> Tan-awa kung giunsa niya pagsulti kanila. Dili kini para sa mga dili-magtotoo. Para kini sa iglesia. Nanawag kini didto sa mga tinawag-pagawas, sa mga gibalaan na ug kadtong mga tinawag nga anaa na kang Cristo Jesus.

<sup>65</sup> Karon, kung gusto ninyong mahibaloan kung unsaon nato nga makasulod kang Cristo Jesus, kung ablihan ninyo ang Unang Mga Taga-Corinto 12, ang giingon niini, “Kay pinaagi sa usa ka Espiritu kitang tanan nabautismohan ngadto sa usa ka Lawas.” Unsaon kono? Gibautismohan kono pinaagi sa unsa? Sa Espiritu Santo. Dili pinaagi sa tubig nga bautismo, kamong mga tawong taga-Church of Christ, kondili pinaagi sa usa ra ka dakung titik E-s-p-i-r-i-t-u, pinaagi sa usa ka Espiritu. Dili pinaagi sa usa ka pagpakiglamano, o pinaagi sa usa ka sinulat, dili usab pinaagi sa

usa ka pagwisik-wisik. Kondili, “Pinaagi sa usa ka Espiritu kita nabautismohan pasulod sa usa ka Lawas,” ang atong panag-iya, ang Yuta nga gihatag kanato sa Dios para puy-an, ang Espiritu Santo. Ingon nga gihatag Niya ang Canaan ngadto sa mga Judio, ingon man usab nga ginahatag Niya kanato ang Balaang Espiritu. “Pinaagi sa usa ka Espiritu kita nabautismohan ngadto sa usa ka Lawas.” Nasabtan ba ninyo?

<sup>66</sup> Karon, kaestorya niya ang mga espirituwal nga Canaanhon, ang Israel, ang espirituwal nga Israel nga nanag-iya sa yuta. Oh, wala ba kamo nangalipay nga nakagawas na kamo sa mga ahos sa Egipto? Wala ba kamo nangalipay nga nakagawas na kamo sa kamingawan? Ug, hinumdumi, kinahanglan nilang mangaon og manna, nga pagkaon sa mga Anghel nga gikan sa Langit, hangtud nga nakatabok sila padulong sa maong yuta. Ug sa dihang nakatabok na sila padulong sa yuta, mihunong na ang paghulog sa manna. Mihamtong na gyud sila niadtong panahona, ug nangaon na sila sa mais sa maong yuta. Karon, karon dili na kamo mga masuso, karon dili na ninyo gitinguha ang walay sambog nga gatas sa Ebanghelyo, dili na kamo kinahanglan pa nga bebe-bebihon, ug tapik-tapikon, ug agdahon pa nga magsimba, karon kamo mga Cristohanon na gyud nga husto na sa gulang, andam na kamong mangaon karon og mga gahi nga pagkaon. “Andam na kamo nga mosulod sa usa ka butang,” ingon niya. Makasabot na kamo sa mga butang nga laglum ug mabungahon. Oh, diretso na kita niini. Ug, oh, naitago kini sukad pa sa pagkatukod sa kalibutan. Ang ingon niya, “Karon ingon nga nakaabot na kamo niini, sa inyo ko kini igapamulong.” Dili niadtong mga bag-o pa lang mibiya sa Egipto, dili pud niadtong mga anaa pa gihapon sa panaw, kondili para niadtong anaa na nakasulod sa yutang saad, nga mga nakadawat na sa saad.

<sup>67</sup> Pila ang nakadawat na sa saad sa Espiritu Santo? Oh, dili ba kamo malipay nga anaa na kamo sulod sa yuta? Nga anaa ka na nianang lugar karon, nangaon na sa abut nga trigo, nangaon na sa mga solido nga mga butang sa Dios ug adunay tin-aw nga pagsabot. Ang inyong—ang inyong espirituhanong hunahuna hingpit nga wamaglibog. Nakaila mo kung Kinsa gayud Siya. Kabalo na mo kung unsa Siya. Kabalo na mo kung asa kamo padulong. Kabalo na mo sa tanang bahin Niini. Nahibalo gyud mo kung kang Kinsa kamo nagtoo ug nakasigurado gayud nga mahimo Niya kung unsa ang atong gikatugyan ngadto Kaniya niadtong adlaw. Oh, mao kana, kana ang kaestorya karon ni Pablo. Paminaw mo og ayo. Karon matikdi.

*...kasaligan usab diha kang Cristo Jesus:*

<sup>68</sup> Karon, tugoti nga ipautro ko kana sa iglesia. Unsaon man nato pagsulod ngadto kang Cristo? Pinaagi ba sa pagpagpasakop sa iglesia? Dili. Pinaagi ba sa pagbutang sa atong ngalan diha sa usa ka libro? Dili. Sa pagpabautismo ba pinaagi sa pagtuslob?

Dili. Unsaon man nato pagsulod ngadto kang Cristo? Pinaagi sa usa ra ka Balaang Espiritu nabautismohan kitang tanan pasulod sa usa ka saad, ngadto sa Lawas, ug mga umalambit na sa tanan nga anaa sa maong yuta. Amen! Oh, Ako—gusto ko kana. Kung dili pa ako paos, makasinggit na ako. Grabe, sa dihang makasulod na ako nianang yuta, ako na kini. Nakauli na ako; anaa na ako sa Canaan. Nakapailalum na ako sa unsa mang gusto ipabuhat kanako sa Dios. Nagalakaw na ako sa balaang yuta, nga usa ka anak sa Hari, nasul-oban ug andam na. Nakagawas na ako sa Egipto, nakaabot na sa yutang saad, nagmadaugon sa mga pagsulay, nakatabok na sa Jordan pasulod niining bulahan nga saad. Oh, giunsa ko ba sa pagbaton niini? Pinaagi sa usa ra ka Espiritu. Sa mao gihapong paagi kung giunsa ni Pablo pagbaton Niini, nga namuhat kanako sa mao rang paagi kung giunsa Niini pagpamuhat sa iya kaniadto, nga namuhat pud Kini kaninyo sa mao usab nga paagi. “Pinaagi sa usa ra ka Espiritu nabautismohan kitang tanan.” Dili sa pagwisik-wisik, nga gamay ra nga wisik Niini, maanindot na dayon ang gibati; kondili gituslob gayud! Bug-os gayud nga gipasalom, diha sa Espiritu Santo. Mao kana ang saad.

<sup>69</sup> Ang atong Efeso, ang atong Josue, nga mao ang Balaang Espiritu, ang buut ipasabot sa *Josue* “Jesus, Manluluwas.” Ang buut ipasabot sa Josue mao’y Balaang Espiritu nga ginapresentar kini diha sa espirituhanon kung unsa sa natural, nga Siya ang atong halangdong Manggugubat. Siya ang atong halangdong Lider. Maingon nga ang Dios nag-uban kang Josue, mao man usab ang Dios (sa Balaang Espiritu) nga maoy nagapalihok kanato. Ug pagnakasulod ang kasal-anan sa kampo, isulti sa Balaang Espiritu nga hunong sá, “Unsa ma’y nahitabo dinhi sa iglesia? Adunay butang nga sayup.” Oh, dili ba ninyo makita kung unsa nga daghan na kaayo kitang mga anak ni Kish karon? Daghan kaayong mga Saul nga nagagikan sa mga seminaryo ug mga tulonghaan sa teolohiya ug nanagsangyaw ug nanagtudlo niining tinuis nga mga butang, sama sa giingon sa Biblia nga buhaton gyud nila. “Mora ba’g, mga wala sa Pagtoo, nga gihimulag ang ilang kaugalingon sa inyo, nga wala na’y pagpakig-fellowship sa inyo, ug uban pa, nga nagabaton og dagway sa pagkadiosnon ug nanagdumili sa gahum niini: likayi kining maong mga tawhana.” Wala sila mahibalo kung asa sila gikan, dili sila makahatag og unsa man nga tubag.

<sup>70</sup> Ginaingon ko kini nga gikan kang Igsoong Booth Clibborn, nga usa nako ka higala, kung aduna ma’y unsa mang ile- . . . ilehitimong binuhat nga dili iya sa Dios, unsa mang butang sa kalibutan, mao ang usa ka mula. Ang mula mao ang pinakaubos sa tanang butang. Siya mao’y usa . . . siya—wala siya kabalo kung unsa siya. Dili niya mahimong padaghanon ang kaugalingon niya. Dili na pueding paliwaton ang usa ka mula gikan sa usa pa nga mula ug mahimong usa ka mula gihapon. Hangtud ingon

niana na lang siya. Wala siya kabalo kung asa naggikan ang iyang amahan, ni wala pud siya kabalo kung kinsa ang iyang mama, kay siya medyo usa—medyo usa ka asno ug usa ka bayeng kabayo. Wala gyud buhata kana sa Dios. Ayaw ninyo himoa nga iya sa Dios ang ingon niana. Wala gyud kana sukad buhata kana sa Dios. Miingon ang Dios, “Ang tanang butang magapamunga sumala sa ilang matang.” Oo, sir. Pero ang mula mao’y usa—usa ka . . . ang iyang papa usa ka asno ug ang iyang mama usa ka bayeng kabayo, mao nga wala siya kabalo kung asa siya nahisakop. Siya—siya—usa siya ka kabayo nga naningkamot nga mahimong mula, o usa ka mula . . . o—o siya usa ka kabayo nga naningkamot nga mahimong asno, usa ka asno nga naningkamot nga mahimong kabayo. Wala siya kabalo kung asa ba gyud siya. Ug siya ang pinakagahig-ulo sa tanang mananap sa kalibutan. Dili mo pueding ihatag ang gamay’ng pagsalig kaniya.

<sup>71</sup> Ug ingon niana ang kadaghanan sa tawo sa iglesia. Wala sila kabalo kung kinsa ang ilang papa, wala sila kabalo kung kinsa ang ilang mama. Ang nahibaloan lang nila, nga sila’y Presbyterian, o Methodist, o Baptist, o Pentecostal, o kung unsa pa. Wala sila kabalo kung asa sila naggikan. Ug ang usa ka asno, puede mong singgitan siya sa ingon ka daghang higayon nga gusto mong singgitan siya, ug motindog lang siya didto ug ipatingkag kadtong dakung mga dalunggan, ug galutok lang. Makawali ka kanila hangtud magbuntag, ug wala gihapon sila nahibal-an paggawas nila nga sama lang sa pagsulod nila. Karon, mao kana ang tinuod. Dili ko tuyo nga mahimong bastos, pero gusto kong isulti sa inyo ang Kamatuoran.

<sup>72</sup> Pero adunay usa ka butang nga mahimo nilang buhaton, maayo sila nga mga trabahador. Oh, magtrabaho ra gyud na sila, nga magtrabaho, nga magtrabaho, nga magtrabaho. Nadumduman ko hinoon ang tungod niining grupo sa mga Arminian nga kanunay’ng naningkamot gyud nga trabahoon ang ilang pag-adto sa Langit. Husto kana, usa ka mula. Oh, ang Ladies Aid Society, ug ang giorganisang panihapon nga manok, aron may pangbayad, sa magwawali. “Ug kinahanglan natong magpasiugda niining pagsayaw-sayaw, ug niining party-party.” Puro lagi og trabaho, trabaho, trabaho, trabaho, trabaho, trabaho, trabaho. Ug, sila, para diay sa unsa ang ilang gitrabaho?

<sup>73</sup> Pangutan—a gani sila, “Nadawat mo na ba ang Espiritu Santo sukad nga mitoo ka?”

<sup>74</sup> Ipatingkag ra nila ang ilang mga dalunggan, ug wala kabalo kung asa ba gyud sila nahisakop, “Unsa’y buut mong ipasabot? Asa ba gyud diay *kini*? Unsa’y buut mong ipasabot, sa Espiritu Santo? Wala pa ako nakadungog og unsa man bahin Niana. Oh, medyo tingali usa ka ka panatiko.” Kita n’yo, wala sila kabalo kung kinsa si papa, o kung kinsa si mama, hain man niini. Ug kinahanglan mo silang latuson nga latuson sa tanang ginabuhat



mo, latuson *dinhi* ug latuson *didto*, ug latuson *dinhi* ug latuson *didto*. Husto kana, ang usa ka mula.

<sup>75</sup> Pero, sultihan ko kamo, dili mo na kinahanglan buhaton ang ingon niana sa usa ka tinuud lubos ang kaliwat nga kabayo. Witikon mo lang ang latigo sa iyang atubangan usa ka beses, ug igsoon, mokaratil na siya'g dagan. Kabalo na siya kung unsay buhaton niya. Oh, nindot kaayo ang makasakay sa usa ka kabayong lubos ang kaliwat! Pagkanindot isulti, "Sige pa, paspasi." Oh, grabe, manggunit ka na og ayo, halos mabilin na niya sa hangin ang montura.

<sup>76</sup> Ingon niana usab sa mga tinuud nga lubos-kaliwat nga mga Cristohanon. Alleluyah! "Dawata ninyo ang Espiritu Santo. Maghinulsol, ang tagsatagsa kaninyo, ug magpabautismo sa Ngalan ni Jesus Cristo, alang sa kapasayloan sa inyong mga sala." Tua na sila dayon, sa ingon paspas nga mahimo nila nga makaubog sa tubig, adto sila dayon. Di sila mahiluna adlaw ug gabii hangtud nga madawat nila ang Espiritu Santo. Ngano man? Kabalo mo, nahibalo gyud ang usa ka Cristohanon kung kinsa ang iyang Papa. Kita n'yo, nagkinahanglan man gud og duha para magkaaduna og pagkahimugso. Husto kana, papa ug mama. Wala kabalo ang mula kinsa ang papa, o kinsa ang mama. Pero nahibalo kita kung Kinsa si Papa ug si Mama, tungod kay natawo man kita sa sinulat nga Pulong sa Dios, nga gipamatud-an sa Espiritu. Miingon si Pedro, sa Adlaw sa Pentecostes, "Kung maghinulsol kamo ug magpabautismo, ang matag usa kaninyo, sa Ngalan ni Jesus Cristo, alang sa kapasayloan sa inyong mga sala, madawat ninyo ang gasa nga Espiritu Santo."

<sup>77</sup> Ug, igsoon, ang usa ka tinuod nga natawo na pag-usab nga Cristohanon, (oh, grabe) ang iyang espiritu, pagkakita niya sa Pulong, mamadawat niya ang Espiritu Santo. Pangutan-on mo siya sa kung unsa man pagkahuman! Kabalo mismo siya kung asa siya nagabarog. "Nagatoo ka ba sa Balaanong pagpang-ayo?"

"Amen!"

"Nagatoo ka ba sa Ikaduhang Pag-abot?"

"Amen!"

<sup>78</sup> Ipangutana mo kana sa usa ka mula. Sa relihiyong mula, "Uh, wa ko kabalo. Ingon man gud kausa ni Doktor Jones. . . ." Huh! Tan-awa, pareho gyud kang Saul. Kita n'yo? "Oh, wala sila kabalo. Bueno, sultihan ta ka, dili man gud sigurado ang akong iglesia bahin Niini."

<sup>79</sup> Oh, igsoon, pero ang usa ka lalaki ug babaye nga natawo na pag-usab ingon kasigurado gayud sa pag-abot ni Ginoong Jesus, sigurado kaayo sila nga nadawat na nila ang Espiritu Santo nga ingon kasigurado nga adunay Espiritu Santo nga igahatag.

<sup>80</sup> Karon, miingon si Jesus... Ingon sa babaye sa atabay, “Nagasimba kami dinhing bukira, ug ang mga Judio nagasimba didto sa Jerusalem.”

<sup>81</sup> Ingon Niya, “Babaye, paminawa ang Akong mga Pulong! Ang takna nagasingabot, ug karon mao na, nga pangitaon sa Amahan kadtong mga magsisimba Kaniya diha sa Espiritu ug sa Kamatuoran.”

<sup>82</sup> “Ang Imong Pulong mao ang Kamatuoran.” Ug ang matag tawo nga magabasa sa Biblia ug motoo sa matag Pulong nga giingon nianang Biblia, ug nagasunod sa mga panugon Niini, ug nadawat ang mao rang Espiritu Santo nga nadawat nila kaniadto, sa mao rang paagi kung giunsa nila pagdawat Niadto, sa mao rang resulta nilang nadawat Kini, mao ra nga gahum nga aduna kanila sa dihang nadawat nila Kini, kabalo gyud siya kung kinsa ang iyang Papa ug Mama. Nasayod siya nga nahugasan na siya sa Dugo ni Jesus Cristo, natawo na diha sa Espiritu, napuno og dinihogan sa Dios. Kabalo siya kung asa siya nagabarog. Sigurado! Anaa na siya sa Canaan. Kabalo siya kung asa siya naggikan. Ingon niana ang usa ka tinuod nga Cristohanon. Kung pangutan-on mo siya, “Nadawat mo na ba ang Espiritu Santo sukad nga mitoo ka?”

“Amen, Igsoon!”

<sup>83</sup> Sa miaging adlaw atua ako nga nagatindog tupad sa usa ka tigulang nga babayeng balaan, nga nubentay-dos anyos na ang panuigon, nga nagapakigsulti kaniadto sa iyang otsentay anyos nga tigulang nga pastor, ingon ko, “Lola?”

Wala’y samang kadasig, nga miingon siya, “Oo, anak ko.”

<sup>84</sup> Ingon ko, “Unsa na ba kadugay sukad nga nadawat nimo ang Espiritu Santo?”

Miingon siya, “Himaya sa Dios! Mga saysenta na ka tuig ang milabay nga naangkon ko Kini.”

<sup>85</sup> Karon, kung mula pa siya, miingon siya siguro og, “Oy, kadali lang, nakumpirma na ako ug nawisikwisikan niadtong ako’y... Bueno, sigurado gyud, ug gidawat gani nila ako sa simbahan ug gihatud na nako ang akong sulat ngadto sa *ingon niini*.” Oh, kalooy man! Wala man lang nila nahibaloi kung asa sila nahisakop.

<sup>86</sup> Pero ang maong lola nahibalo gayud kung asa naggikan ang iyang katungod sa pagkapanganay. Atua siya mismo sa dihang nahitabo kadto. Natawo siya sa tubig ug sa Espiritu. Kabalo gyud siya, ug sa tubig nga pinaagi sa paghugas sa tubig uban sa Pulong, ginadawat ang Pulong.

<sup>87</sup> Karon bantayi kung kang kinsa kini gisulti, “Sa mga anaa na kang Cristo Jesus.” Si Pablo, karon, hinumdomi... Napadugay na ako, pero dili ko na mahuman kining kapitulo. Pero dalion na nako... Gusto ba ninyo kini? Oh, ginasulti Niini kanato kung asa

na gyud kita, pero dili nato mahisgotan kini sa usa ra ka gabii. Kinahanglan nato og usa ka bulan o duha mahitungod niini, nga sa matag gabii, ato mismong pagahisgotan Kini, Pulong sa Pulong. Balikan ug tan-awon kini diha sa kasaysayan ug ipasabot mismo kini, Pulong sa Pulong, ug ipakita sa inyo nga mao Kini ang Kamatuoran. Karon tugoti kong basahon kana pag-usab sa gilayon ang maong bersekulo.

*Si Pablo, nga apostol ni Jesus Cristo pinaagi sa kabubut-on sa Dios (dili kabubut-on sa tawo), nganha sa mga balaan nga anaa sa Efeso, ug (panumpay) kasaligan usab diha kang Jesus Cristo:*

<sup>88</sup> Buut pasabot, “Mga tinawag na sila, gihimulag, ug karon mga gibautismohan na sa Balaang Espiritu, ug mga anaa na diha kang Cristo Jesus. Kamo ang akong ginapahinungod sa niining sinulat, mga hinigugma ko.” Oh! Nahunahuna ko karon si Pablo nga atua mismo kauban nila, oh, daw unsa ka malipayon! Ang maong luoy’ng tigulang na nga apostol nga giputlan og ulo didto. Mitindog ako kaniadto abay sa mismong lugar kung diin nila siya giputlan og ulo. Pero, oh, ang ulo niya atua na karon sa bag-ong lawas, ug dili na gyud mahimong putlon pa pag-usab. Ug atua siya didto nga kauban nila karon sa niining minuto mismo, ang mao rang apostol nga nagsulat Niini. Ug miingon, “Sa inyo nga mga anaa na kang Cristo Jesus! Pinaagi sa usa ra ka Espiritu kitang tanan nabautismohan ngadto niining usa ra ka Lawas.” Karon bantayi.

*Ang grasya maanaa kaninyo, ug ang kalinaw, nga gikan sa Dios nga atong Amahan, ug...ang atong Ginoong Jesus Cristo.*

*Dalaygon ang Dios ug Amahan sa atong Ginoong Jesus Cristo, nga mao’y nagpanalangin kanato sa tanan...*

Oh, nadungog n’yo ba kana, Charlie?

*...nga nagpanalangin kanato sa tanang panalangin nga espirituhanon...*

<sup>89</sup> Dili lang pipila nga para sa mga apostoles, ug pipila nga para sa *niini*, kondili nagpanalangin Siya kanato sa tanang panalangin nga espirituhanon. Ang mao rang Espiritu Santo nga mikunsad sa Adlaw sa Pentecostes mao ra sa gihapon ang Espiritu Santo nga ania karong gabhiona. Ang mao rang Espiritu Santo nga nakapasinggit kang Maria ug nakapasulti kaniya og laing mga pinulongan, ug naghatag kaniya og maanindot nga panahon ug kasadya, ug nagpabuhat kaniya sa mga butang nga gibuhat niya, maoy ang mao ra sa gihapon nga Espiritu Santo nga ania dinhi karong gabhiona. Ang mao rang Espiritu Santo nga nagpasakay kang Pablo niadtong daang barko, kon diin gisudlan na og ayo sa tubig ug halos malunod na, ug sulod sa katorse ka adlaw ug gabii, wala man lang og bulan

o mga bitoon. Nagtan-aw siya didto ug sa matag balod atua ang yawa, nga nagatan-aw, ug nanggilaw ang iyang ngipon, ug miingon, “Lumsan ta ka, tiguwanga ka, ha. Akoa ka na karon.”

<sup>90</sup> Ug sa pagnaug ni Pablo para mag-ampo og diyutay, may nagtindog didto nga usa ka Manulonda, miingon, “Ayaw kahalok, Pablo. Maguba kining karaang barko didto sa isla. Padayon lang ug manihapon ka, okey na ang tanan karon.”

<sup>91</sup> Ania na siya nga nakakadena ang iyang mga luoy’ng kamot, nga ginaguyod ang mga niini sa iyang mga tiil, ug miingon, “Magmaisugon kamo, mga kalalaken-an, tungod nga ang Dios, ang Manulonda sa Dios, nga Kaniya ako’y suluguon, nagtindog tupad kanako kaganina ug miingon, ‘Pablo, ayaw’g kahadlok.’” Ang mao ra nga Espiritu Santo ania dinhi karong gabhiona, ang mao ra nga Espiritu sa Dios, nga nagahatud kanato sa mao ra nga mga panalangin nga espirituhanon.

*. . . nagpanalangin kanato sa tanang panalangin nga espirituhanon sa mga langitnong dapit . . .*

<sup>92</sup> Oh, mohunong lang usá kita og usa pa ka minuto dinhi. “Sa mga Langitnong dapit.” Karon, dili lang basta sa kung asa, kondili sa mga Langitnong dapit. Nagkatigum kita sa “Langitnon,” ang buut ipasabot niini mao kanang posisyon sa magtotoo. Nga, kung ako nakaampo na, kamo nakaampo na, o ang iglesia nakaampo na, ug andam na kita para sa Mensahe, ug nga nagkatigum kita sa atong mga kaugalingon ingon nga mga balaan, mga tinawag, bautismado na sa Espiritu Santo, puno sa mga panalangin sa Dios, tinawag, mga pinili, kauban nga nanaglingkod sa mga Langitnong dapit karon, mga Langitnong ta sa atong mga kalag. Gidala na kita sa atong mga espiritu ngadto sa usa ka Langitnong kahimtang. Oh, igsoon! Tan-awa, usa ka Langitnong kahimtang! Oh, aduna gyu’y mahitabo karong gabhiona, aduna gyu’y mahitabo karong gabhiona kung maglingkod lang kita sa usa ka Langitnong kahimtang, ug nagapanglihok ang Espiritu Santo sa matag kasingkasing nga mga nabag-o na ug nahimong bag-ong mga binuhat diha kang Cristo Jesus? Ang tanang nga mga kasal-anan napailalum na sa Dugo, diha sa hingpit nga pagsimba, uban sa atong mga kamot nga nakataas ngadto sa Dios ug gibayaw ang atong mga kasingkasing, anaa sa mga Langitnong dapit diha kang Cristo Jesus, magkauban nga nagasimba diha sa mga Langitnong dapit.

<sup>93</sup> Nahiadto na ba kamo sa ingon nianang dapit? Oh, nahiadto na ako hangtud sa makahilak ako tungod sa kalipay ug miingon, “Dios, ayaw tugoting makahawa pa ako dinhi.” Sa mga Langitnong dapit gayud diha kang Cristo Jesus!

<sup>94</sup> Nagapanalangin kanato sa unsa? Langitnong pagpang-ayo, pagkahibalo-nang-daan, kapadayagan, mga panan-awon, mga gahum, mga pagsulti og laing pinulungan, mga interpretasyon,

kaalam, kahibalo, tanan nang Langitnong panalangin, ug dili-ikaasoy'ng kalipay ug puno sa Himaya, nga ang matag kasingkasing puno sa Espiritu, nga uban-uban nga nagalakaw, magkauban sa mga Langitnong dapit, wala ni usa ka daotang hunahuna ang anaa sa atong taliwala, walay giyupyop ni usa ka sigarilyo, wala ni usa ka bisti nga mugbo, wala ni usa nga *ingon niini*, *ingon niana* o *uban pa*, wala ni usa ka daotan nga gihunahuna, wala'y ni usa ang dunay panagbangi ngadto sa usa pa, ang tanan nagasulti nga mgay gugma ug panag-uyon, nga ang tanan nagkahiusa diha sa usa ka dapit, “dayon sa kalit lang may miabot gikan sa Langit nga sama sa usa ka nagahaguros nga makusog nga hangin.” Tan-awa, “Nagpanalangin kanato sa tanang espirituhanong panalangin.”

<sup>95</sup> Dayon mahimong mokunsad ang Balaang Espiritu sa usa ka tawo, ug moingon, “MAO KINI ANG GINAINGON SA GINOO. Pag-adto sa ingon niining lugar ug buhaton mo ang ingon niining butang.” Bantayi ninyo nga mahitabo kini nga sama mismo *niana*. [Ginapalagitik ni Igsoong Branham ang iyang tudlo—Ed.] Kita n'yo? “MAO KINI ANG GINAINGON SA GINOO. Buhaton mo ang ingon niini nga butang sa ingon niana nga lugar.” Bantayi ninyo nga mahitabo kini nga sama mismo *niana*. [Ginapalagitik ni Igsoong Branham ang iyang tudlo.]

<sup>96</sup> “Nagpanalangin kanato sa tanang panalangin nga Langitnon diha sa mga Langitnong dapit.” Bantayi!

*Ingon nga siya nga nagpili kanato . . .*

<sup>97</sup> Gipili ba nato Siya, o Siya ang nagpili kanato? Siya ang nagpili kanato. Kanus-a man? Niadtong gabii ba nga gidawat nato Siya? Gipili!

*Ingon nga siya nga nagpili kanato diha kaniya sa wala pa ang mga pagkatukod sa kalibutan, aron kita mahimong balaan. . .wala'y ikasaway sa iyang atubangan diha. . .(sa mga denominasyon ba?) . . .diha sa gugma:*

<sup>98</sup> Kanus-a ba kita gipili sa Dios? Kanus-a ba gipili sa Dios kamo nga mga nakadawat na sa Espiritu Santo? Kanus-a ka ba Niya gipili? Sa wala pa ang pagkatukod sa kalibutan. Pinaagi sa Iyang pagkahibalo-nang-daan, una ka na Niyang nakita ug nahibaloan na nga higugmaon mo Siya. Ug sa wala pa ang pagkatukod sa kalibutan, gipili ka na Niya, ug gipadala si Jesus para Siya ang mahimong halad-pasighiuli para sa inyong mga kasal-anan, para mapasig-uli ka, ngadto Kaniya, sa gugma. Oh, unta aduna pa kita og pipila ka minuto.

<sup>99</sup> Tugoti ako, sa dili pa kita mopadayon sa unahan, balikan nato, ang Genesis 1:26. Ipadayon ko kini sa Miyerkules pa. Sa dihang gibuhat sa Dios ang tawo. . .Sa wala pa Niya buhata ang tawo, gitawag Niya ang Iyang Kaugalingon “El,” E-l, El; E-l-h, “Elah,” “Elohim.” Ang maong pulong

nagkahulogan, sa Hebreo, “ang nagalungtad-nga-nag-inusara,” nga Siya ra nag-inusara. Wala’y nabuhi nga una pa Kaniya, Siya lamang ang bugtong buhi nga nagkaaduna sukad-sukad, ang Maong nagalungtad-nga-nag-inusara! El, Elah, Elohim, nagakahulogan nga “may-kasarang-sa-tanan, pinakagamhanan-sa-tanan, Makagagahum-sa-tanan, ang Maong nagalungtad-nga-nag-inusara.” Oh!

<sup>100</sup> Pero sa Genesis 2, sa dihang gibuhat Niya ang tawo, miingon Siya, “Ako man,” Y-a-h-u, J-u-v-u-h, *Yahweh*, “Jehovah.” Unsa ba’y buut ipasabot niadto? “Ako man ang Maong nagalungtad-nga-nag-inusara Nga nagbuhat og usa ka butang nga gikan Mismo Kanako, para mahimong Akong anak, o usa ka temporaryo, o usa ka gamay, gamay’ng Ako.” Himaya! Ngano man? Gihatag Niya sa tawo... Ang buut ipasabot sa *Jehovah* “Gihatag Niya sa tawo nga mahimong usa ka gamay nga dios.” Tungod kay Siya mao ang Amahang Dios, ug gihimo Niya ang tawo nga mahimong gamay nga dios, busa dili na Siya nagalungtad-nga-nag-inusara, nag-mabuhi na Siya kauban sa Iyang panimalay. Elah, Elah, Elohim. Karon, Siya na si Jehovah karon. Ang *Jehovah*, nagkahulogan na, ang “Usa Nga nagmabuhi uban sa Iyang panimalay.” Karon, gihimo sa Dios ang tawo aron mamuno sa tibuok kalibutan, nga aduna siya’y gingharian. Ug ang kalibutan mao ang gingharian sa tawo. Anaa ba sa Kasulatan kana? Kung ingon niana nga gingharian niya kini, dios siya sa kalibutan. Mahimo siyang magsulti, ug mahitabo mismo kini. Mahimo niyang isulti ang *ingon niini*, ug mahitabo pud kini. Oh! Tua ra Siya, ang Dios, si Jehovah, ang Usa Nga kaniadto nagmabuhi nga nagalungtad-nga-nag-inusara, pero karon nagmabuhi nga uban na sa Iyang panimalay, ug ang Iyang mga gagmay’ng anak mao’y kauban na Niya. Tan-awa.

<sup>101</sup> Karon basaha ninyo kana. Pagahisgotan nato kana sa Miyerkules sa gabii, kung aduna pa og daghang oras. Mga anaa sa kinse minutos na lang kita ug atong... Abi nako maapil nako og hisgot ang usa ka bahin dinhi, pero dili gyud diay makaya, niining bahin kon diin kita giselyohan na sa Balaang Espiritu sa saad. Sige.

<sup>102</sup> Karon, kanus-a ba kita gitawag aron mamahimong mga alagad sa Dios? Kanus-a ba gitawag si Orman Neville aron mamahimong alagad sa Dios? Oh, grabe! Nakapahingangha gyud kini kanako. Sultihan ta mo, basahon nato ang pipila ka Kasulatan. Gusto kong basahon mo ang Unang Pedro 1:20. Ug, Pat, basaha pud ang Pinadayag 17:8. Ug basahon nako ang Pinadayag 13. Karon gusto natong maminaw dinhi, kung gusto ninyo mahibaloan kung kanus-a kamo gitawag sa Dios aron mamahimong Cristohanon. Oh, gusto ko kaayo kini. Kining, “Ang tawo dili mabuhi sa tinapay lamang, kondili sa matag Pulong nga nagagula sa baba sa Dios.” Sige, Igoong Neville,

sa imo ang Unang Pedro 1:20. [Nagaingon si Igsoong Neville, “1:20.”—Ed.] Oo, basaha ang 1:19 ug 1:20. Paminawa ninyo kini. [“1:19 ug 20.”] Oo.

*[Kondili sa bililhon nga dugo ni Cristo, ingon sa usa ka cordero nga walay buling ug walay mansa:]*

*[Nga sa pagkamatuod, gitagana nang daan sa wala pa ang pagkatukod sa kalibutan, apan nga gipadayag sa katapusan sa mga panahon tungod kaninyo.]*

<sup>103</sup> Kanus-a Siyang gitagana nang daan? Sa wala pa ang pagkatukod sa kalibutan. Igsoong Pat, basahon mo ang Pinadayag 17:8 para sa ako.

*[Ang mapintas nga mananap nga imong nakita mao ang sa kaniadto, ug dili ang sa karon; ug mao ang molugwa gikan sa bung-aw sa kahiladman nga walay kinutoban, ug mopadulong sa pagkalaglag: Ug ang mga nanagpuyo sa yuta manghibulong sila, kinsang mga ngalan wala mahisulat sa basahon sa kinabuhi sukad sa pagkatukod sa kalibutan, sila mahibulong sa pagkakita sa mapintas nga mananap nga mao ang sa kaniadto, ug dili mao ang sa karon, ug mao ang sa umalabot.]*

<sup>104</sup> Kinsa man ang malimbongan? Kinsa ang malimbongan sa niining tawo nga relihiyoso nga sama ni Saul? Maliputon kini kaayo ug haum gyud kaayo hangtud nga malimbongan niini ang unsa? Ang mismong Pi- . . . [Nagaingon ang kongregasyon, “Pinili.”—Ed.] kung. . . [“mahimo.”] kung mahimo. Sige, Pinadayag 13:8, tugoti ako nga basahon kini para sa inyo:

*Ug ang tanang nagapuyo sa yuta. . . ang tanang nagapuyo sa yuta magasimba kaniya, tanan sila kinsang mga ngalan nga wala mahisulat sa libro sa kinabuhi nga iya sa gipatay nga Cordero sa wala pa ang pagkatukod sa kalibutan.*

<sup>105</sup> Kanus-a gisulat ang atong mga ngalan sa Libro sa Kinabuhi sa Cordero? Niadtong gipatay ang Cordero sa wala pa ang pagkatukod sa kalibutan. Sa dihang ang Dios mao pa si Jehovah, El, Elah, Elohim, ang Maong nagalungtad-nga-nag-inusara. Sama Siya mismo sa usa ka daku og bililhong Diamante, ug dili na mamahimong uban pa, pero sa sulod niining Diamante mao ang Iyang mga kinaiyahan ingon nga usa ka Manluluwas. Sa niining mga kinaiyahan, sa sulod niini Kaniya, mao ang pagka-Mananambal. Bueno, wala pa man kaniadto og unsa man nga pagaluwason ug unsa man nga pagaayohon, pero gihimo kini sa Iyang mga kinaiyahan. Busa, kaniadto sa wala pa ang pagkatukod sa kalibutan, sa dihang nahibalo Siya, sa niining dakung kinaiyahan nga anaa sa sulod Niya, nga Siya’y mamahimong usa ka Manluluwas, nga Siya moanhi ug mamahimong unod ug magpuyo ipon kanato, ug nahibalo nga Siya pinaagi sa Iyang mga labud mangaayo kita, gipatay Niya

ang Cordero diha sa Iyang Libro sa wala pa ang pagkatukod sa kalibutan, ug gisulat ang inyong ngalan sa nianang Libro sa wala pa ang pagkatukod sa kalibutan. Oh!

<sup>106</sup> Paminaw kamo Niini! Ang pagpili-nang-daan nagalantaw pabalik ngadto sa pagkahibalo-nang-daan, ang buut kong ipasabot ang pagkapili diay. Ang pagkapili nagalantaw pabalik ngadto sa pagkahibalo-nang-daan, ug ang pagpili-nang-daan nagalantaw sa dangatan. Ayaw kalimti kana, nga ang pagkapili nagalantaw dinhi, niining sa karon, “Usa ako kaniadto ka amorseko. Natawo ako sa sala, giumol diha sa kadautan, mianhi sa kalibutan nga nagapanulti’g bakak, natawo taliwala sa mga makasasala. Si papa ug mama ug ang tibuok kong pamilya, makasasala. Usa ako kaniadto ka amorseko. Pero, sa kalit lang, nahimo akong lugas sa trigo. Giunsa man pagkahitabo niini?” Kana, unsa man kana? Pagkapili. Ang Dios, sa wala pa ang pagkatukod sa kalibutan, gipili na daan kana nga amorseko nga mamahimong lugas sa trigo. “Karon kabalo na ko nga usa ako ka lugas sa trigo, tungod kay naluwas ako. Giunsa man nako paghimo niini?” Tan-awa pabalik ug makita ninyo nga kini gipili na Niyang daan, sa dugay na kaniadto. Pinaagi sa pagkahibalo-nang-daan nakita na Niya nga higugmaon ko Siya, busa Siya naghimo og halad-pasighiuli pinaagi sa Iyang Kaugalingong Anak, aron nga pinaagi Kaniya ako nga usa ka amorseko mamahimong usa ka lugas nga trigo. “Karon, asa na ako karon?” Naluwas na ako, nga nagalakaw na diha sa grasya sa Dios. “Unsa man ang ginalantaw sa pagpili-nang-daan?” Ang padulngan. “Asa Niya ako dad-on, ug asa man ako padulong?” Amen. Gisigurado ka na. Tan-awa.

<sup>107</sup> Karon basahon sa unahan pa, ug kinahanglan na natong humanon dayon sa dili madugay.

*Ingon nga siya . . .nagpili kanato diha kaniya sa wala pa ang pagkatukod sa kalibutan, aron kita mahimong balaan . . .walay ikasaway sa iyang atubangan diha sa gugma:*

*ingon nga kita Iyang gipili-nang-daan aron mahimong sinagop, gipili-nang-daan aron mahimong sinagop nga mga anak pinaagi kang Jesus Cristo ngadto sa iyang kaugalingon, sumala sa kahimut-an sa iyang kabubut-on,*

<sup>108</sup> Unsa man ang Iyang gibuhay? Siya, pinaagi sa pagkahibalo-nang-daan, nakita na kita, sa paghibalo nga Siya mao’y Manluluwas, ang nagalungtad-nga-nag-inusara. Wala pa’y mga Anghel kaniadto, wala pa’y ni bisan usa; ang Dios lang, si Elah, Elohim, ang Maong nagalungtad-nga-nag-inusara, wala na’y uban pa kondili Siya ra gayud. Pero anaa sa sulod Niya ang pagka Manluluwas. Bueno, unsa ma’y luwason Niya kaniadto, nga wala pa ma’y nalaglag? Nasayod Siya niana,



dayon hingsayran Niya usab nga kining bililhong kinaiyahan sa sulod Niya mamahimong realidad sa umalabot nga mahimo na Siyang mangluwas. Dayon sa dihang nasayran kana, pinaagi sa Iyang pagkahibalo-nang-daan midungaw Siya sa umalabot ug nakita Niya ang matag usa nga modawat Niini. Ug dayon pagkakita niana, ingon Niya, “Aron maluwas kana, ang bugtong paagi nga mamahimo Ko kini, mao nga manaug Ako Mismo ug mamahimong unod ug angkonon ang kasal-anan sa tawo, ug mamatay alang kaniya, para Ako ang Usa nga simbahan,” tungod kay Siya’y Dios, ang mao lang nga silimbahan.

<sup>109</sup> Dayon nanaug Siya ug gipas-an kini sa Iyang Kaugalingon. Ug sa diha nga gibuhat Niya kadto, gibuhat Niya kadto para maluwas ka Niya nga gustong maluwas. Nakita ba ninyo ang buut kong ipasabot? Pinaagi sa pagkahibalo-nang-daan, ang walay-kinutuban nga Dios, Nga nasayod sa tanang butang, nakita na ang Cordero, ug gipatay na Niya ang Cordero sa wala pa ang pagkatukod sa kalibutan, ug gisulat na Niya ang imong ngalan diha sa Basahon sa Kinabuhi nga iya sa Cordero. Ug nakita na Niya ang pagkamalimbongon ni Satanas, kung unsa ang iyang buhaton. Busa gisulat na Niya ang imong ngalan didto. Ug giingon Niya nga mamahimong relihiyoso kaayo ang anticristo, buotan kaayo, ingon ka maayo gayud, ingon ka utokan, ingon mismo ka relihiyoso, nga malimbongan niini ang mismong mga Pinili kon mahimo pa. Pero imposible kini, tungod kay gikatagana-nang-daan ang ilang mga ngalan sa wala pa ang pagkatukod sa kalibutan. Pinaagi sa pagkapili Iyang gipili sila, ug tungod nga mga gibut-an-nang-daan kabalo sila kung asa sila padulong. Kana lang.

<sup>110</sup> Karon, kinsa man ang magduhaduha niana? Mao man kana ang giingon ni Pablo. Kana ang Kasulatan ni Pablo. Kana ang sinulat ni Pablo. Mao man kana ang gitudlo niya sa iyang iglesia. Ang iglesia, diha sa posisyon niini, sa wala pa ang pagkatukod sa kalibutan. Sa diha ang Dios, sa Iyang kasakit sa pagpanganak, gipanganak, gipanganak ka, nahibalo na Siya kung unsay imong pagabuhaton, gipuwesto ka Niya sa imong posisyon diha sa Iya Mismong Lawas, nga mahimong usa ka asawa-sa-panimalay, mahimong usa ka mag-uuma, mahimong usa ka magwawali, mahimong usa ka propeta, aron mahimong *ingon niini* o mahimong *ingon niana*. Gipuwesto ka Niya sa imong posisyon. Dayon sa dihang nanggikan na kita gikan sa mga yutang ahos sa Egipto, pinaagi sa pagpabalaan, ug nabautismohan na pasulod sa yutang saad. . . Kay, ang saad sa Dios mao ang Espiritu Santo. Mga Taga-Efeso 4:30 nag-ingon, “Ayaw ninyo pagpasub-a ang Balaang Espiritu sa Dios ni kinsa giselyohan kamo hangtud sa adlaw sa pagtubos.” Dayon ang Dios, ingon nga gipili-nang-daan ang iglesia, ingon Niya, “Ug ang tanang mga tawo, magkaaduna og minilyon-milyon nga magkinabuhi og relihiyoso kaayo ug malimbungan.” Ang dili

gayud malimbongan kadto lang ang mga nakasulod na sa yutang saad, nga sa wala pa ang pagkatukod sa kalibutan nasulat na ang ilang mga ngalan sa Basahon sa Kinabuhi sa Cordero, ug nakasulod na sa yutang saad, ug nagakalipay niini.

<sup>111</sup> Daghang mga tawo ang nahadlok nga manglihok ka nga daw sa kataw-anan. Daghang mga tawo ang nahadlok nga pabuhaton ka sa Espiritu Santo og usa ka butang nga ikaw—maulawan ka sa mga tawo. Daghang mga tawo ang nahadlok nga basin mohilak sila, ug makita unya sa ilang mga hinigugma nga nanghilak sila, o ni mama, o sa inyong silingan, o kaha makita sa inyong agalon.

<sup>112</sup> Tugoti kong isulti sa inyo ang bahin sa usa ka tawo usa niana ka higayon, sa dili pa kita mahuman. Adunay usa ka lalaki nga ginganlan og David, ug atua niadto ang arka sa Dios didto sa yuta sa mga Filistihanon, ug naitabok kini nila, nga gisakay ang maong arka, nga ginabira kini sa usa ka baka, sa dihang nakita ni David ang arka nga nagasingabot, nagsul-ob siya niadto og mubong bisti, midagan siya sa pagtagbo didto, nga gilukso ang iyang mga tiil, ug nagsige'g lukso-lukso, ug nagsinggit ug milukso, ug misayaw ug milukso ug misayaw. Ug, siya niadto, ang hari sa Israel! Ug midungaw sa bintana ang iyang asawa ug nakita si David nga nagalihok nga salikwaot, gikaulaw niya si David. Aba, miingon siguro ang maong asawa, “Bugok gyud! Tan-awa gani siya didto, kung unsa ang ginabuhat niya, ginasipasipa ang iyang mga tiil, ug nagaluksolukso ug nagalihok nga ingon niana. Aba, nabuang na siguro siya!” Ug niadtong gabhiona sa pagsulod na ni David, giingon sa asawa, sa ingon niining pagkasulti, “Aba, gipakaulawan man ko nimo. Amaw, man ka, nga hari, nga bana nako, nga nagalihok didto og ingon niana, naglihok nga sama niana!”

<sup>113</sup> Ingon ni David, “Ugma mas panindoton ko pa kana. Oo, sir!” Ingon niya, “Wala ka ba kabalo nga nagsayaw man ko ngadto sa Ginoo?” Nakalabang na siya! Nakasulod na siya sa yutang saad. Nawala na sa kaniya ang mga kaartehan-sa-kaugalingon ug hugaw sa kalibutan. Malipayon kaayo siya nga nahibalo nga ang arka nagasingabot na sa kaugalingon niyang siyudad.

<sup>114</sup> Ug, oh sultihan ko kamo, nahadlok ang ubang tawo nga dawaton ang Espiritu Santo, nahadlok nga makasulti sila sa ubang mga pinulongan. Nahadlok sila nga basin may magsulti, “Karon, usa na siya kanila nga mga tawong nagasulti og laing mga dila.” Nahadlok sila nga mosulod sa simbahan ug mabautismohan sa Ngalan ni Jesus Cristo, tungod kay gikaulaw nila Kini. Uh! Oh!

<sup>115</sup> Adunay nagsulti nga kinahanglan ko kono ipabalik ang mga teyp ko, tungod kay nagwali ako sa pagpabautismo sa Ngalan ni Jesus Cristo. Dili ko ipabalik ang mga niini. Mas daghan pa gani ang buhaton ko! Husto kana, nga, magbuhat pa og mas daghan! Kana ang ingon sa Biblia. Kung dili nila gusto

ang gibuhat nato kagahapon, tan-awon nalang nila kung unsa pa ang pagabuhaton nato ugma! Ingon niana ang angay nga buhaton, nakita n'yo, ang magpadayon lang. Wala'y katapusan niini, tungod kay iya man kini sa Ginoo. Ang Dios kini.

<sup>116</sup> Kabalo ba mo kung unsay gibuhat sa Dios? Midungaw ang Dios gikan sa Langit, miingon Siya, "David, ikaw ang tawong tukma sa kasingkasing Ko Mismo." Wala gyud maulaw si David. Usa siya ka alagad sa Ginoo. Gihigugma niya ang Ginoo. Ug malipayon kaayo siya, grabeng kalipay, hangtud nga wala na niya hunahunaa ang kadungganang pangtawo.

<sup>117</sup> Nakita n'yo, sumala sa giingon ko na sa akong wali kaganinang buntag, sobra ra kaayo ang kahadlok nato, nga, gusto nato nga usa ka Saul nga naggikan sa kung asa nga seminaryo para sultihan kita kung unsa'y angay natong buhaton sa atong relihiyon ug kung sa unsang paagi nato kini buhaton. Mao kana ang pikas bahin nga tabok sa Jordan kaniadto. Sa niining bahin, ang Balaang Espiritu na ang nagagiya. Sa niining dapit wala kana sa nianang kahugawan. Sa niining dapit wala kana'y pagpakabana sa kung unsa'y ilang hunahunaon. Sa niining dapit patay ka na, ug ang imong kinabuhi natago na diha kang Cristo pinaagi. . . ug selyado na sa Espiritu Santo. Wala kana'y pagpanumbaling. Nagapuyo ka na sa Canaan. Mahimo na nimong kumaon sa maayong mais. Bag-ong binuhat ka na diha kang Cristo Jesus. Nagpadulong ka na sa yutang saad.

<sup>118</sup> Nadumduman nako nga nagtindog ako didto, Igsoong Collins, sobra na sa traynta ka tuig ang milabay, niadtong wala pa natukod kining simbahan. Usa pa lang ka gamay'ng toldang tigum nga gipahigayon ko dinhi sa kanto kaniadto, ang una nakong tigum. Ginawali ko na kaniadto kining mao ra nga Maayong Balita, ang mao ra gihapong butang, ang dili matukib nga mga bahandi ni Cristo: ang bautismo sa tubig diha sa Ngalan ni Jesus Cristo, ang pagtoo sa matag Pulong nga mao ang Kamatuoran, ang bautismo sa Espiritu Santo, ang Langitnong pagpang-ayo, ang mga gahum sa Dios, sama sa pagwali nako Niini karon, nga wala gayud pagbag-o ni usa ka pulgada gikan Niini. Mas daghan pa Niini ang gipadayag sa Dios kanako, gani, sa diha nga ginapadayag Niya Kini, padayon ko lang nga ginawali Kini. Wala gayud Niya sukad gikulangan ang kung unsay naiwali na, padayon lamang Siya nga nagdugang pa Niini.

<sup>119</sup> Nagtindog ako didto sa dihang mga lima ka gatus ka mga tawo ang nagtindog sa tampi, nga nanag-awit sa, "On Jordan's stormy banks I stand, and cast a wishful eye, to Canaan's fair and happy land, where my possessions lie. When shall I reach that healthful shore and be forever blest, when shall I reach and be in my Father's. . . and forever rest?" Sa dihang nagsugod na sila sa pag-awit niana, Ginadala ko niadto ang usa ka batang lalaki ngadto sa suba para bautismohan siya didto sa Ngalan

ni Ginoong Jesus. Miingon ko, “Langitnong Amahan, sa diha nga ginadala nako kining batang lalaki nganha Kanimo sumala sa iyang pagpamahayag. . .” Usa lang pud ka batan-on, ako mismo, may mga letrato ako niadto sa balay. Miingon ko, “Sa diha nga bautismohan ko siya diha sa tubig, Ginoo, sumala sa iyang pagpamahayag, sa Ngalan ni Jesus Cristo ang Anak sa Dios, pun-on Mo siya sa Espiritu Santo.” Ug mga ingon niadtong orasa dunay sa kung Unsa nga nag-alimpulos, ug nagtuyoktuyok Kini paubos, nga ang Kasanag ug ang Bitoon sa Kabuntagon atua didto. Atua mismo didto ang Kahayag nga makita ninyo nianang letrato. Nagpaibabaw Kini didto.

<sup>120</sup> Naibalita kadto sa tibuok kalibutan, hangtud sa Canada ug sa tanang dapit. Ingon nila, “Usa ka mysteryosong Kahayag ang nagpakita ibabaw sa usa ka lokal nga ministrong Baptist samtang siya nagpangbautismo.”

<sup>121</sup> Mga pipila lang ka adlaw ang milabay, nagbisita kanako si Doktor Lamsa, ug wala pa ko’y hingbaloan bahin niadto, ug gidala niya sa ako ang usa ka letrato, nga gidala karon sa usa ka igsoon. Dala mo ba kadtong letrato? Dala mo ba kadtong Biblia, nga nasukup kini dinha, o atua ba kadto sa imong libro? Sige. Aduna man gud og usa ka letrato mahitungod sa Hebreohanong karaang ilhanan sa Dios, nga parehong-pareho niadtong aduna sa mga panahon ni Job, sa wala pa gisulat ang Biblia. Ang Dios diha sa Iyang tulo ka kinaiyahan, dili tulo ka mga dios. Usa ra ka Dios diha sa tulo ka kinaiyahan: Amahan, Anak, ug Balaang Espiritu, tulo ka opisina nga nagapamuhat ang Dios. Dili tulo ka mga dios, tulo ka kinaiyahan! Ug didto Kini kaniadto. Sa dihang ang inila, nga si Doktor Lamsa, ang naghimo og hubad nga Bibliang Lamsa, sa diha nga miingon siya niadtong buntaga. . . Sa dihang gipangutana ko kadto kaniya, ingon ko—ingon ko, “Unsa man kana nga ilahanan?”

<sup>122</sup> Miingon siya, “Mao kana ang karaang ilhanan sa Dios, sa Hebreohanon. Ang Dios, ang usa ra nga Dios diha sa tulo ka kinaiyahan.”

Ingon ko, “Sama ba sa Amahan, Anak, ug Espiritu Santo?”

<sup>123</sup> Mihunong siya, ug gibutang niya ang iyang tasa sa kape, og mitan-aw siya sa ako. Gene, mora’g atua pud ikaw niadtong higayona, Leo. Miingon, “Nagatoo ka ba niana?”

Ingon ko, “Sa tibuok kong binabuhi.”

<sup>124</sup> Miingon siya, “Kagabii, sa didto ako sa imong tigum, Igsoong Branham, nakita ko kanang pagpang-ila. Wala ko pa kini nakita kaniadto sa Amerika, sa akong yutang natawhan.” Miingon siya, “Kining mga Amerikano wala gyuy nahibal-an sa Biblia. Ang ila lamang nahibaloan ang ilang denominasyon. Wala man gani sila nakahibalo sa ilang gibarugan.” Miingon, “Wala gyud sila’y nahibal-an.” Miingon siya, “Pero niadtong nagtindog ako didto kagabii,” miingon, “ingon ko. . .” Karon, Igsoong Gene, isulti ko

lang kini nga may pagtahod ug gugma ug ingon niana. Miingon siya, “Nakaingon ko, ‘Siguradong usa gyud kana ka propeta.’ Dayon sa dihang nakita ko nga nagtoo ka nga ang Amahan, Anak ug Espiritu Santo dili tulo ka dios, nga kini mga kinaiyahan lang, nan nahibaloan nako nga usa ikaw ka propeta sa Dios, o wala kini napadayag nganha kanimo nga sama niana.” Miingon siya, “Kana’y usa gyud ka hingpit nga ilhanan.” Miingon, “Wala ko sukad. . .” Miingon, “Dili ka ba Oneness?”

<sup>125</sup> Ingon ko, “Dili, sir. Dili ako Oneness. Nagatoo ako nga ang Dios ang mao’y Makagagahum nga Dios, ug ang tulo ka kinaiyahan mao ang tulo ka opisina lamang nga gipuy-an sa usa ra ka Dios.”

<sup>126</sup> Miingon siya, “Panalanginan ang imong kasingkasing!” Miingon siya, “Sa umalabot nga adlaw imong igabubo ang imong dugo ibabaw sa yuta tungod niana, pero,” miingon, “kanunay man namatay ang mga propeta tungod sa ilang gibarugan.”

<sup>127</sup> Ug miingon ko, “Mahitabo na ang mahitabo, kung makapahimuot kana sa akong Ginoo.” Siya ang naghimo og hubad nga Bibliang Lamsa.

<sup>128</sup> Oh, tinuod gyud kana. Pila na ka higayon, sama sa giingon na nako sa niining iglesia, sama sa giingon ni Samuel kaniadto sa wala pa nila mapili si Saul, “Sa dili pa kamo moadto ug magpamiyembro sa kung unsang denominasyon karon, ug magpagapos sa inyong kaugalingon sa kung unsang klase nga relihiyon, nganong dili man ninyo tugotan nga giyahan kamo sa Balaang Espiritu?” Nganong dili man ninyo himoon ingon nga inyong Lider ang Dios ug tugotan Siya nga panalanginan kamo, ug kalimtan ang bahin sa inyong denominasyon? Karon, wala ko magsulti nga dili na kamo magpamiyembro sa unsa mang denominasyon nga simbahan, magpamiyembro mo sa unsa man nga gusto ninyo. Anaa ra kana kaninyo. Pero sultihan ko kamo, ingon nga indibiduwal, magpagiya kamo sa Balaang Espiritu. Basaha ninyo ang Biblia. Ug kung unsa ang ginaingon sa Biblia nga buhaton ninyo, buhaton ninyo. Ang Dios magapanalangin kaninyo.

<sup>129</sup> Ug karon dugay na nga panahon akong naghulat. Naghunahuna ako kung aduna kaha dinhi nga gustong mopila sa linya para maiampo. Kung gusto nila, mahimo ba nilang ipataas ang ilang mga kamot. Dunay usa, duha, tulo. Sige. Duol na kamong tanan dinhi ug magtindog dinhi dayon kung gusto ninyo, sa niining higayona, ug—ug magkaaduna kita og pagampo. Ug dayon atong. . . Dili ko pa gusto nga mamauli kamo. May uban pa akong gustong buhatong opisyal sa dili pa kita—kita magtapos.

<sup>130</sup> Pila ba ang gusto nga magtuon sa Basahon sa Mga Taga-Galacia. . . oh, sa Mga Taga-Efeso diay? Bueno, Miyerkules sa gabii, hisgotan na nato ang Selyo. Ug dayon sa sunod Dominggo

sa buntag, hisgotan pud nato ang pagpuwesto sa iglesia. Oh, kung. . . hisgotan siguro nato ang bahin niana, sa umaabot nga Miyerkules sa gabii, sa inyo nga mga taga-dinhi sa Jeff. Ang pagpuwesto sa iglesia kung asa sila angayn'g ipuwesto, ang matag usa. Kung giunsa kita sa pagtawag pinaagi sa pagsagop. Gisagop kita sa Dios nga mahimong mga anak, mga anak kita pinaagi sa pagkahimugso. Gisagop ug gipuwesto pinaagi sa Balaang Espiritu. Tan-awa! Ang matag usa kanila kaniadto mga Hebreohanon, niadtong gitabok nila ang suba, pero gibahinbahin ni Josue ang yuta ug gihatag sa matag usa ang ilahang yuta sumala sa gipamulong sa ilang mama niadtong gipanganak sila, kon diin sila igapahiluna nga gisulti sa Balaang Espiritu ngadto sa ilang mama.

<sup>131</sup> Tan-awa si Jacob niadtong hapit na siya mamatay, usa ka propeta, nabuta na, nga gipasaka niya ang iyang mga tiil sa higdaanan, miingon, “Umari kamo mga anak nga lalaki ni Jacob ug isulti ko sa inyo kung asa kamo padulong sa kaulahi-ang adlaw.” Himaya! Oh, kabalo ko nga ako’y medyo salikwaut. Mora ba’g salikwaut usahay ang mga tawo. Pero, oh, kung mahibaloan lang n’yo ang—ang kasiguroan, ang—ang pagdilaab sulod sa kasingkasing! “Umari kamo ug sultihan ko kamo kung asa kamo sa kaulahi-ang mga adlaw.” Ug mahimo nako basihan ang mao mismong Kasulatan, ug subayon sa mapa kung asa na ang lokasyon sa maong mga Judio sa karon ug pamatud-an ko sa inyo nga anaa sila sa eksaktong lugar nga giingon ni Jacob nga kahimutangan nila sa kaulahi-ang adlaw. Ug wala sila sukad pa kaniadto, nahiadto didto, wala pa nahiadto sa maong lugar hangtud nga namauli na sila sugod niadtong ikapito sa Mayo, 1946, niadtong gabhiona mismo nga ang Manulonda sa Ginoo nagpakita kanako ug gisulti ang mahitungod sa niining misyon. Ug mapakita nako sa inyo nga, sa dihang namalik na sila ngadto sa bag-ong yuta, didto sila mismo napahiluna sa mga lugar nga giingon ni Jacob nga pagapuy-an nila. Ug didto mismo sila nagpuyo karon. Oh, oh, grabe, oh, grabe! Adlaw-adlaw na kitang nagakahaduol sa atong Pagpauli, kana lang.

<sup>132</sup> Kamong mga pinalangga, kamo may mga sakit, o wala kamo magtindog dinha nga para lang makatindog. Inyo akong igsoon. Adunay sugo kanako gikan sa Dios nga iampo ang mga masakiton. Dili ingon nga ako. . . ingon nga aduna ako og gahum sa pagpang-ayo, nga wala man ako. Pero aduna kanako ang gahum sa pag-ampo. Sama sa gikaingon ko na kaganinang buntag, wala gayud si David og bisan unsa man gawas ra sa usa ka gamay’ng lambuyog, pero miingon siya, “Kabalo ko kung unsa ang mahimo niini tungod sa gahum sa Dios nga nagpaluyo niini.” Kita n’yo? Aduna lamang ako og gamay’ng pag-ampo nga mahimong itanyag para sa inyo, ug ang mga kamot ko nga maipandong sa inyo, pero kabalo ko kung unsa ang kahimoan sa pagtoo ngadto sa Dios. Nahimo na kini ngadto sa uban, mohimo

usab kini para sa inyo. Toohan ninyo kana karon samtang nagapaingon kamo dinhi, nagapaduol pa dinhi.

<sup>133</sup> Karon, nahunahunaan ko, para mas mapadali kini, ginahangyo ko ang akong igsoon kung mahimo nga moduol dinhi ug dihogan sila og lana. Mahimo mo bang buhaton kana, Igsoong Neville? Hangyoon ko ang iglesia kung mahimo kamong moduko sa pag-ampo.

<sup>134</sup> Karon hinumdumi, sa miaging semana niadtong grabe ang akong gibati tungod niadtong castor oil, mohatag gyud ko og bisan unsa man kung aduna lang makaadto ug magpandong sa iyang kamot kanako. Kung aduna lang unta makabisita kanako niadto, nga gipanalanginan sa Dios ug gitabangan, ikalipay ko gayud unta. Nabati ninyong tanan karon ang pareho sa gibati ko kaniadto. Nabati ninyo karon nga gusto ninyong buhaton ko kung unsa ang gusto kong buhaton unta kanako ni kinsa man niadtong panahona. Ayaw gyud unta itugot Dios nga maglikay ako sa maong katungdanan. Itugot kanunay kanako, nga bisan gikapoy na, nga bisan hago na, nga bisan dili ko na halos matikang ang usa ka tiil sunod sa usa pa, makaadto gyud gihapon ko, tungod kay makigtagbo man ako sa matag usa kaninyo pag-usab, didto sa nianang Yuta.

<sup>135</sup> Dayon kamong mga tigulang na nga babaye, tigulang na nga mga kalalaken-an, nga mga nangaluya na, ubanon na ang buhok ug nangluro na, ug hinayhinay na nga nagakalaya sama sa usa ka rosas nga gibuka ang gamay'ng piyoos niini, nangatagak ang mga gihay ug nangahulog, hinayhinay ka nang nagakamatay, dili ba? Husto kana. Ug ang... Ug ang butang na lang nga gusto ninyong magpabilin nga magkauban maoy aron magasidlak para sa kahimayaan sa Dios. Busa sa dihang gisakmit kamo sa kaaway ug gidagan, ako'y paingon na kanimo nga dala ang lambuyog sa Dios, uban ang pagtoo, uban ang gasa nga gihatag kanako sa Dios. Ania ang gisulti ko, aron nga masabtan gyud ninyo kini. Ingon ko, "Kung moabot lang unta si Pedro, o ang uban kanila." Ayaw isulti ang ingon niana. Dili na ninyo kinahanglan iampo nga moabot ako. Basta buhaton n'yo lang nga ingon niini, ug moingon, sama niining babaye, moingon, "Ikaw ba si Igsoong *Ingon niini-ug-ingon niana?*" Unsa'y imong ngalan? Igsoong Howard. Ingon mo, "Ikaw si Igsoong Howard. Usa ikaw ka magtotoo, Igsoong babayeng Howard? Nagatoo ka. Usa ikaw ka magtotoo. Kung ingon-ana, nakita mo, aduna kamo og mga katungod sa tanang panalangin nga apil na sa pagtubos kanimo." Dayon moingon ko, "Igsoong babayeng Howard, mamaayo na ang tanan," ug molakaw na. Oh, kung unsa nga... miingon ko, "Mosiya git ako, mosinggit ako." Moingon ko, "Ginoo, kinahanglan mahitabo gyud kini. Kinahanglan mahitabo gyud."

<sup>136</sup> Ug nahunahuna ko, "Bueno, ingon niana usab ang gihunahuna sa mga tawo kung moabot ako og iampo sila."

Busa ingon gyud niana. Nakita ba ninyo kung unsa ang buut kong ipasabot?

<sup>137</sup> Ug nagtindog ako, sa daghang mga higayon na, ug gunitan ang mga tawo, ug moingon, “Oh, bililhong igsoong babaye, motoo ka ba Niini? Oh, motoo ka ba Niini?” “Ginoo, Oh Dios, ipatoo sila Niini. Himoa nga motoo sila Niini.” “Oh, palihog, dawaton mo ba Kini karon?” Dili na ingon niana. Dili ko na kana ginabuhat. Dili ko na kana ginabuhat.

Ingon niini na lang ang ginasulti ko, “Igsoong babayeng Howard, usa ba ikaw ka magtotoo?”

“Oo, ako man.”

<sup>138</sup> “Sige, Igsoong babayeng Howard, kung ikaw usa ka magtotoo, usa ikaw ka manununod sa tanang nga aduna ang Dios.” Ug gigunitan nako ang iyang kamot. Kita n’yo, nagtoo ako niana. Ginakontak nako si Igsoong babayeng Howard pinaagi sa pagpandong sa akong mga kamot diha kaniya. Wala gyud magsulti si Jesus “iampo ninyo sila,” ang giingon Niya, “Pandongi lang sila og mga kamot.” Ingon niana lang, dayon mamaayo na siya. Mahimong moingon siya, “Okey na ang tanan,” Igsoong babayeng Howard. Dayon puede ka na mouli ug mamaayo na. Ang Dios magapanalangin kanimo.

<sup>139</sup> Ikaw si Igsoong babayeng...[Nagaingon ang igsoong babaye, “Hampton.”—Ed.] Igsoong babayeng Hampton, ikaw usa ka magtotoo, dili ba? [“Oo.”] Usa ikaw ka manununod sa tanan nga Iyang gitanyag. Ang Dios magauban kanimo, Igsoong Hampton. Pauli ka na ug mamaayo na. Pagaayohon ka ni Jesus Cristo.

<sup>140</sup> Ikaw si Igsoong babayeng...[Nagaingon ang usa ka igsoong lalaki, “Slaughter.”—Ed.] Slaughter. Mao kana’y... Ikaw kadtong naiampo namo didto sa ospital. Usa ikaw ka magtotoo, kung ingon niana, Igsoong Slaughter, usa ikaw ka manununod sa tanan nga atong pangayoon. Igsoong Slaughter, hinaut nga madawat mo kung unsa ang imong gipangamuyo, ug mamaayo na. Itugot kini sa Dios nganha kanimo.

<sup>141</sup> Igsoong Gene, nagatoo ka ba nga ihatag sa Dios kana kanimo? [Nagaingon si Igsoong Gene, “Oo, sir. Oo, sir.”—Ed.] Ug hinaut nga ihatag sa Ginoong Dios kana kanimo, Gene, ang mismong gipangayo mo! . . . ? . . .

<sup>142</sup> Nakaila ako kanimo. [Nagsulti ang igsoong babaye—Ed.] Usa ikaw ka magtotoo, igsoon. Nakaila ako kanimo. Ang imong bana kadto. Kadtong naiampo ko gamit ang telepono niadtong adlaw. Kanunay kong nahinumduman kana. Dili siya una makaadto sa tigum didto sa Tulsa. Pagkasunod nakatambong pud siya sa panagtigum. Ug giayo na siya sa Ginoo, ipaadto man siya sa maong tigum. Ingon nga kahalili ania ka para sa uban. [“Sa akong pag-umangkon.”] Cristohanon kaayo kini nga butang, igsoon! Kita n’yo? Siya pud kaniadto ang kahalili,



mihalili Siya para kanatong tanan. Usa ikaw ka magtotoo ug may katungod sa tanan nga gisaad sa Dios. Ako ang Iyang alagad. Ug pinaagi sa Ngalan ni Jesus Cristo, ginahatag ko kanimo kung unsay gipangayo mo.

<sup>143</sup> Ari ka, Igsoong Neil. Panalanginan ka sa Dios. Dugay na kining maayo kaayo kanimo. Usa ikaw ka magtotoo. Kabalo ko nga ingon niana ka. Nagatoo ko nga ihatag kanimo sa Dios ang tanan nga gipangayo mo, tungod nga usa ikaw ka magtotoo. Ug ingon nga Iyang alagad, kanimo, akong igsoon, sa Ngalan ni Jesus Cristo, ginahatag ko sa imo ang gitinguha sa imong kasingkasing. Lakaw ug dawata kini. Panalanginan ka sa Dios.

<sup>144</sup> Igsoong babayeng Bruce, nakaila ako kanimo. Kaila ka sa nars nga naghaplas sa akong likod. Taga-didto siya sa lugar nga duol sa Motel JJ, Twin J, o mora'g ingon niana. Nagatindog ka dinha para sa uban. Ug unsa man ang gitinguha mo karong gabhiona gikan sa imong Amahan? [Nagaingon si Igsoong babayeng Bruce, "Para sa akong kaugalingon, karong gabhiona."—Ed.] Para sa imong kaugalingon, karong gabhiona. [Nagasulti pag-usab si Igsoong babayeng Bruce.] Kung ingon-ana, gibunlot ka sa kaaway nga dili na mahimong maabot sa doktor, pero adtoon ta ka, dala ang usa ka lambuyog. Ug sa Ngalan ni Jesus Cristo, ginatumong ko ang bala sa lambuyog sa bato nga anaa nga nag-ali sa imong kidney. Dad-on ka niini pabalik sa Dios, sa Iyang balay.

Gipangamuyo namo kini Kanimo, pinaagi sa Ngalan ni Jesus Cristo. Amen.

<sup>145</sup> Ikaw ba ang amahan niining lalaki, sir? Usa ba ikaw ka magtotoo? [Nagasulti ang igsoon—Ed.] Usa ka hernia ang anaa sa imong kiliran; sa ubos, ug diha sa imong wala nga kilid. Nagatoo ka ba nga ihatag sa Dios kanimo kini, sir, ug ingon nga Iyang alagad?

<sup>146</sup> Ginoo, kining kamot mahimong daghan og mabug-at nga mga buluhaton ang nahimo adlaw-adlaw. Mianhi siya para sa usa ka katuyoan, usa ka butang nga pagabuhaton. Ihatag ngadto niini, ang gitinguha sa iyang kasingkasing, Amahan, sa diha nga ginaampo ko nga ihatag Mo kini sa Ngalan ni Jesus. Amen.

<sup>147</sup> Ayaw pagduhaduha. Kana hernia pahunongon na sa pagsakit sa imo sa sulod, ug mamaayo ka na. Panalanginan ka sa Dios. . . ? . . .

<sup>148</sup> [Nagaingon ang usa ka igsoong babaye, "Masakit ang akong ulo ug ang akong tutonlan, masakit ang akong mga gusok kung moubo ako. Dili ako makakanta. Dili ko makapanglihoklihok. Akong. . . ? . . . Ug dili ako makatulog og ayo. Wala ko'y mahimo bisan unsa."—Ed.] Usa ikaw ka magtotoo, dili ba? ["Oo. Napuno na ako sa Espiritu Santo."] Usa ikaw ka magtotoo. ["Kabalo ko nga nagapuyo ang Dios sa sulod ko."] Ug ikaw usa—ikaw usa ka manununod sa tanan niining mga panalangin. ["Kabalo

ko. Ug nagtoo ko. Nagtoo ko sa imong mga pag-ampo, Igsoong Branham. Nagtoo ko nga pagaayohon ako sa Dios. Nagtoo ko nga Iyang ginadungog ang imong mga pag-ampo.”] Salamat.

<sup>149</sup> Amahan, ginadala ko kining, akong igsoong babaye, diha sa linya sa kalayo, sa mismong sentro sa puntinganan. Ug ginadala nako siya pabalik sa Imo, gikan sa pagkagunit sa kaaway, sa Ngalan ni Jesus Cristo. Amen.

<sup>150</sup> Ingon niana mismo ang mahitabo.

<sup>151</sup> [Nagaingon ang usa ka igsoong babaye, “. . . ? . . . duna ko’y usa ka бага nga naghimalatyon na, ug ang usa patay na.”—Ed.] Usa ka operasyon sa бага.

<sup>152</sup> Oh Ginoo, sa pagtindog niining batan-ong babaye dinhi, bisan nga anaa pa siya sa iyang pagkabatan-on, nagaampo ako para kaniya. Ug usa ka бага nga kinahanglan tangtangan, ug magtikubo na gyud siya, sa nahabilin niyang kinabuhi. Ikaw ang among Amahan, ug ginatumong ko ang kalayo sa pag-ampo ngadto mismo kaniya, Ginoo, direktso mismo nianang бага. Ginapadala ko kining pag-ampo sa Ngalan ni Jesus Cristo. Hinaut nga ig-on niini kanang бага ug ayohon kini. Sa Ngalan ni Jesus Cristo, ako kining ginapangamuyo. Amen.

<sup>153</sup> Ikaw si Igsoong babayeng. . . [Nagaingon ang igsoong babaye, “Igsoong Gibbs.”—Ed.] Igsoong Gibbs. [“Sa ulo mismo, ug gasakit ang palibot niini.”] Mismo. Nakaduko ang imong ulo padulong kanako. Usa ikaw ka magtotoo ug usa ka manununod sa tanang mga panalangin sa Dios, Igsoong babayeng Gibbs.

<sup>154</sup> Ginoo, ginadala ko siya sa Imo, gamit ang gamay’ng lambuyog nga gihatag Mo kanako, maingon nga gihatagan Mo si David og usa ka lambuyog, para bantayan ang karnero sa iyang amahan. Ug kung mosulod man ang kaaway aron sakmiton ang karnero, wala siya mahadlok. Gipudyot niya ang maong lambuyog ug gigukod mismo ang mga leon ug—ug ang mga oso, ug nakuha niya balik ang karnero. Mao kini ang pag-ampo nga inubanan og pagtoo. Gisulti Mo kanako nga kung akong “mapatoo ang mga tawo ug ako’y magmatinuoron.” Ginadala ko pabalik si Igsoong babayeng Gert karong gabhiona. Ginabawi nako siya gikan sa mga kamot sa kaaway. Siya’y Imong karnero. Ginadala ko siya pabalik sa imong panon Amahan, sa Ngalan ni Jesus Cristo. Amen.

<sup>155</sup> [Nagaingon ang usa ka igsoong babaye, “Igsoong Lowe.”—Ed.] Igsoong Lowe. [“Aduna ko’y altapresyon.”] Altapresyon. Ug usa ikaw ka magtotoo, dili ba, Igsoong babayeng Lowe? Usa ka manununod sa tanang panalangin.

<sup>156</sup> Kung ingon-ana, Amahang Dios, ginapunting nako kining pag-ampo karong gabhiona, ingon nga gikan sa lambuyog nga iya sa Dios, para sa altapresyon ni Igsoong babaye Lowe. Ug hinaut nga sa sunod higayon nga kuhaan siya og presyon sa dugo niining doktor, unta motan-aw kini sa iya ug moingon, “Normal

na kini karon.” Mahibaloan na niya kung unsa ang naghimo niini. Sa Ngalan ni Jesus Cristo, ginahatag ko kini sa iya. Amen.

<sup>157</sup> [Nagapakigsulti ang usa ka igsoong lalaki ngadto kang Igsoong Branham—Ed.] Oo. Gusto nako nga ania unta ang akong papa karong gabhiona, maiampo ko unta siya karon. Iampo ko ang sa imoha, usab. Nasabtan nako.

<sup>158</sup> Langitnong Amahan, ang papa sa niining lalaki, nga maoy hinungdan nga ania siya sa kalibutan karong gabhiona. Ug tinguha sa mismo niyang anak nga madala pabalik ang iyang papa; nga napahilayo na gayud ngadto sa kalibutan sa kasalanan, palahubog. Oh Ginoo, ginapadala ko kining pag-ampo nga inubanan og pagtoo ug kusog, ug uban sa tanan nga mahimo kong ilabay, kining gamay’ng bato, sa Ngalan ni Ginoong Jesus. Ginalambuyog ko kini padulong nianang yawa nga misakmit nianang butanga didto. Ug hinaut nga mobiya na kini. Ug hinaut nga luwas na siya nga makasulod sa panon, sa Ngalan ni Jesus. Amen.

<sup>159</sup> [Nagaingon ang usa ka igsoong lalaki, “Iampo ako, Igsoong Branham, aron maangkon ang Espiritu Santo. Gusto nakong madawat ang Espiritu Santo. Kinahanglan nako. Aduna ko’y pangandoy. Kinahanglan ko nga madawat ang Espiritu Santo.”] Aduna ka’y pangandoy nga madawat Kini. Gusto nimo nga makasulod sa Yuta kon diin anaa ang tanang mga saad. [“Oo.”]

<sup>160</sup> Ug karon, Ginoo, kining lalakiha atua pa sa pikas sa suba, nagkampo sa pikas nga dapit, ug nagataob na ang Jordan. Ug wala’y paagi kaniya aron makatabok gawas nga maghimo Ka og paagi sama sa gihimo Mo kaniadto para kang Josue ug para sa Israel. Ug, Amahan, nangamuyo ako Kanimo, ingon nga Imong alagad, tugoti ang among bilihong igsoon, Oh Dios, tugoti nga makasulod siya sa niining Yutang saad, sa niining saad. Nga, sa pikas nga bahin, ingon nga gidala Mo ako niadtong miaging gabii, hinaut nga magkaaduna ako og pribilihiyo nga magunitan siya ug magakus siya, didto sa pikas Yuta, nga nagaingon, “Akong bililhong Igsoon.” Itugot kini, Ginoo. Hinaut nga madawat niya ang saad sa Dios, ang Espiritu Santo. Amen.

<sup>161</sup> Oh Ginoo, niining, akong bililhong igsoon; kining kamot nga dugay nang buotan sa ako, ug nagbuhat og mga maayong butang para kanako, nga wala-maibutyag. Nagatoo siya ug aduna siya’y pagtoo. Ug naningkamot karon ang kaaway nga sakmiton kining, akong higala: diabetes. Ug gihunahuna sa kaaway nga iyang—mahimo niyang sakmiton kining lalaki. Pero giapas ko siya. Nagapadulong na ako, para dalhon pabalik ang sa Imo, Ginoo, nga ginalambuyog kining bato nga nakasentro ang pagtoo. Sa Ngalan ni Jesus Cristo ig-on nako kanang sugar diabetes! . . . ? . . . ang akong igsoon. Dalhon pabalik ang sa Imo Mismong karnero sa panon, Amahan, sa Ngalan ni Jesus. Amen.

[Nagapakig-estorya si Igsoong babayeng Bell kang Igsoong Branham—Ed.]

<sup>162</sup> Oh Ginoo, nahibal-an sa among igsoong babaye nga ang sobrang-kabug-at, sama sa ginaingon sa doktor, mao ang butang nga mopatay sa imo. “Ang matag libra, tungod sa sobrang-kabug-at, nagaiban og usa ka tuig,” basi sa insurance calendar. Ug gusto pa niya nga mabuhi para sa kadungganan ug pagdalayeg sa Dios. Ug wala’y doktor nga makahimo niini, Amahang Dios. Anaa lamang kini sa—sa Imong kamot. Ug si Igsoong babayeng Bell nagmatinud-anon gayud. Ug buotan kaayo ug nagmaantuson siya sa mga pagsulay, nga naagihan niya. Miagi na siya sa daghang mga grabeng pagsulay. Nagaduol ako para sa iya karong gabhiona, Ginoo. Moadto ako para atubangan kang kaaway. Ako kining ginapunting sa ingon gayud ka eksakto kutob sa akong mahimo. Sa Ngalan ni Jesus Cristo akong ginalabay ang maong bato sa pagtoo ngadto niining kaaway nga nagsakmit kaniya. Hinaut nga patlaagon niini ang yawa, ug mokaratil og dagan palayo gikan kaniya, ug siya maibalik na pag-usab ngadto sa malandong og lunhay nga sibsibanan ug sa mga tubig nga malinaw, pinaagi ni Jesus Cristo. Amen.

Mahinabo gayud kana, Igsoong babayeng Bell. Ayaw lang pagduhaduha.

<sup>163</sup> Igsoong babayeng Spencer. [Nagaingon si Igsoong babayeng Spencer, “Igsoon, Igsoong Bill, mas labi ko pa nga gihigugma ang Ginoo sa adlaw-adlaw nakong pagkinabuhi. Ug dugay na akong nagaanhi mga baynte na ka tuig, niining lugara. Ug naayo ako gikan sa halos tanan na nga nahimong problema kanako. Nadumduman mo ang kana tanan, ug. . . ? . . .”—Ed.] Siguradong nadumduman ko, igsoon. . . ? . . . [“Ug gipanalanginan Niya ako og ayo! Ug labi ko pa Siyang gihigugma, sa matag adlaw sa akong kinabuhi. Nahibalo ko nga dugay na akong adunay maanindot nga kinabuhi diha sa Ginoo.”] Nagatoo ako niana, Igsoong Spencer. [“Malipayon ako. Malipayon gyud ako! Kung dili man kini ang Espiritu Santo nga naangkon ko, ako—siguro anaa sa gihapon ako sa altar tungod sa tanang butang nga gihatag Niya para kanako, Ug mamatay na lang ako sa altar.”] Amen. [“Mao kana kung unsa ang gusto nako nga buhaton Niya ug maghimalatyon ako diha sa altar uban kang Jesus.”] Amen. Panalanginan ka sa Dios. . . ? . . . Amen. [“Ug sultihan ko ikaw kung unsa ang gusto ko unta nga buhaton mo. Kabalo ka, gidala ni Noe ang iyang tibuok pamilya, ug gusto nako pud ang akong tibuok pamilya. Kabalo ka gusto nako nga maluwas ang akong mga hinigugma.”] Nasabtan ko. Ang imong mga anak. Husto kana. [“. . . ? . . . ang akong mga anak.”] Oo, mam. [“Ug lakip ang akong bana.”] Oo, sige, akong. . . [“Maingon sa nahibaloan mo na tanan bahin niini.”] Oo. [“Nag-ampo ka na para kanamo.”]

164 Naila na natong tanan si Igsoong babayeng Spencer, ug nahibalo kung unsa nga siya ug si Igsoong Jess nagpabilin gihapon bisan sa mga kalisod, pero bisan sa mga kalisod nagaanhi gihapon sila sa iglesia. Pag makatabok na ako sa pikas nga bahin, dili na sila maglisod nga maglakaw-lakaw nga sama niini. Mabatan-on na sila. Oh! Igsoong Jess, kung ako lamang...?...kabalo ka na. Ug ayha ninyo mahibaloan tanan kung unsa nga, pagdidto—pagdidto na sa tabok nga...?... didto, mobalik ka sa imong pagkamatahum nga batan-ong babaye pag-usab, ug si Igsoong Jess pud mamahimong batan-ong lalaki. Nagsaad na ang Dios sa inyo.

165 Karon, tan-awa. Gusto kong maghatag sa inyo og usa ra ka gamay'ng pagtudlo, ingon nga ikaw ang ulahi dinhi, gusto nako ihatag.

166 Sa hinungdan nga, kabalo ko nga kini ang anak mong lalaki, Charlie. Gusto nimo nga ipangamuyo ko kini? [Nagaingon si Igsoong Charlie, "Oo."—Ed.]

167 Gusto kong isulti kining usa ka butang. Nabasa ba ninyo sa Kasulatan kon diin giingon niini sa Biblia? Gisultihan ni Pablo ang Romanong Centurion.

Inyo ba akong madungog og maayo? [Nagaingon ang kongregasyon, "Amen."—Ed.]

168 Gisultihan ang Romano, sa dihang mihulbot sa iyang espada, para maghunus sa iyang kaugalingon, didto sa Filipos sa dihang nabilanggo siya. Ug giuyog sa linog ang bilanggoan. Miingon siya, "Magtoo ka kay Ginoong Jesus Cristo, ug ikaw ug ang imong panimalay mamaluwas." Nadungog n'yo na ba kana? "Ikaw ug ang imong panimalay." Karon, tan-awa. Kung may igong pagtoo ka para maluwas ang imong kaugalingon, dili ba magkaaduna pud ka og igong pagtoo para sa imong panimalay? Ang Dios, sa kung unsa mang paagi, pagabuhaton gyud kana.

169 Ug, Ginoo, nagapangamuyo ako para kang Igsoong babayeng Spencer ug Igsoong Spencer, karong gabhiona, nga unta ang ilang matag anak, sila ug ang ilang mga anak, maanaa tanan sa nianang mahimayaon, malipayong Yuta kon diin wala na'y mga balatian o wala na'y pagkatigulang, wala na'y kagul-anan o mga kapakyasan, ug ang tanan niining mubo nga kinabuhi dinhi mangahanaw na lang nga damgong-makalilisan nga miagi. Hinaut nga madawat nila kini, ug hinaut ang tanan niyang anak, ug ang iyang bana, ang tanan niyang minahal sa kinabuhi, ug ang tanan nga nagmahal kaniya, ug ang tanan nga iyang gimahal, hinaut nga maatua didto uban kaniya, sa Ngalan ni Jesus. Amen.

170 [Nagaingon si Igsoong babayeng Spencer, "Amen. Salamat."—Ed.] Panalanginan ka sa Dios. ["Hapit na ako, mag otsentay-dos."] Otsentay-dos anyos na. ["...?...Pero nagakaluya na kini, sa ingon nianang edad. Pero ako sa gihapon

ang nagaluto, nagalaba, ug nagapamalantsa, ug nagalimpyo sa balay.”] Sama lang sa kalibutan nga nagakalumpag na, Igsoong babayeng Spencer. [“Oo, mao gyud. Kapoy ako, pirme. Nagakahitabo pud kini sa ila. . . Gipangutana ko ang akong mama, ang akong inaina, nga nagnubenta na ang panuigon, kung unsa’y bation nimo kung matigulang ka na, dugay na kadto nga panahon. Miingon siya, ‘Rose, siguro pirme kang kapuyon.’ Ginakapoy gyud ko.”] Bueno, hapit ka na nga magpahulay, nakita mo. [“Gikapoy na ako og ayo, sa tanang panahon. Nagkinahanglan na ako og pahulay. Nagkinahanglan na ako niana.”] Oo, mam. [“Ug gusto ko nang magpahulay sa Ginoo, nga nakaluhod. Sa tanan, sa tanan nga gikihanglan ko.”] Oo. Ipadayon lang ang imong pagtoo nganha Kaniya, Igsoong Spencer, ug makatabok ka gyud didto. [“Gusto kong mamatay sa altar, sa Ngalan ni Jesus. Mao kana ang gusto ko nga makita, basta nga padayon pa Siyang nagapanawag.”] Ug Miingon siya. . . [“Gusto ko na ang tanan-tanan nga giandam Niya para kanako.”] Ug sa ingon ka sigurado gayud nga nagatindog ako dinhi kauban mo, karong gabhiona, Igsoong Spencer, sa Iyang grasya makita ta gyud ka ug si Jess didto sa tabok nga lugar, nga batan-on ug himsog na. Kamong tanan managan, manghugyaw, “Akong igsoong lalaki! Akong igsoon!” Magkitakita kita didto.

Ang iyang nerbiyos.

<sup>171</sup> Amahang Dios, nagkaaduna kining babaye og pagkanerbiyos, ug wala na’y mahimo para kaniya ang medisina. Siya na lang, ang nagpugong. Pero nagaduol ako para kaniya karong gabhiona. Nagaduol ako Kanimo, Amahan. Nagaduol ako, nagahangyo Kanimo nga idrekta ang pagpusil nga gikinahanglan ko, nga pagapabuthon ko. Hinaut nga nakasentro gyud kini og ayo, nga ang puntinganan nakasentro mismo sa iyang likod. Hinaut ig-on niining pag-ampo, sa Ngalan ni Jesus Cristo, ang pagkanerbiyos ug bitas-bitason kini, nga dalhon pabalik kining karnero ngadto sa sibsibanan sa Dios. Amen.

Siguradong mamaingon gyud niana, pinangga.

<sup>172</sup> [Nagaingon ang usa ka igsoong babaye, “Iampo lang. Aduna ko’y unom ka mga anak nga gipangamuyo ko sa Dios nga ayohon ug luwason.”—Ed.]

<sup>173</sup> Dios sa Langit, itugot nga, ang unom niyang mga anak nga gitinguha niya nga maluwas. Nadungog niya ang testimonyo ni Igsoong Daulton, mahitungod sa matahum niyang mga babayeng-anak. Gipangamuyo usab sa maong babaye ang unom niyang mga anak, Amahan. Maiya unta sila. Makita unta nila siya didto nianang Yuta kon diin wala na’y gabii, luwas nga gipanalipdan ug nakapasilong sa Dugo ni Jesus Cristo. Amen.

Maimo unta sila, igsoon, ang akong pag-ampo.

[Nagapakig-estorya ang usa ka igsoong babaye kang Igsoong Branham—Ed.]

174 Nagatoo ko sa imo. Halos, wala na’y, makatabang niini. Ginahatagan nila sila og gamay’ng tableta nga mora’g, oh, mora og sama sa usa ka acetamin. Usa kini ka cortisone, ang tawag nila niini. Pero, halos, patyon ka niana. Ginadaot niana ang imong dugo. Pero, tan-awa. Nakita n’yo, ang arthritis sama ra sa leon nga mingtangag sa karnero dayon midagan palayo. Karon, unsa ma’y buhaton sa usa ka lambuyog? Oh, grabe! Adunay dakung, nagangulob nga leon nga gitangag ang usa ka karnero. Ug ampay niini ang karnero, busa midagan dayon kini nga tangag ang karnero. Pero mikuha si David og lambuyog ug gigukod kadto. Kita n’yo? Karon bantayi. Aduna siya og lima ka mga bato: f-a-i-t-h [p-a-g-t-o-o-tigh.], siya mismo, s-a. Ang iyang lambuyog anaa sa *niining* kamot: J-e-s-u-s. Usa siya ka hingigo. May siguradong mahitabo. Gukdon nato kanang arthritis, karong gabhiona, pinaagi niining pag-ampo. Hinaut nga ihatag sa Dios kini sa imo.

175 [Nagapakig-estorya ang igsoong babaye kang Igsoong Branham—Ed.] Gusto niya nga magpabautismo sa Ngalan? [“Dili. Dili. Wala siya nagsulti niana.”] Gusto nimo siya nga mabautismohan. [“Tinguha nako nga makita siya nga mabautismohan.”] Salamat, igsoon. Dili sa hinungdan nga ingon niana nga paagi. Kini tungod...Karon, kung anaa kana sa Biblia, kanang, “Amahan, Anak, ug Espiritu Santo,” ako—toohan ko kana, magpabilin ako mismo niana, igsoon. Ako—ayaw ko nga magpalahi-lahi. Ako—gusto gyud nako nga parehas ra. Dili nako tugotan...ako—manubag gyud ako para niana, nakita n’yo. Ug kinahanglan kong isulti kini sa paagi nga ginasulti *Niana*; dili nga magpalahi-lahi, kondili ang sa tinuod lang.

176 Karon, Amahan, nagadangop kami para sa iyang mga minahal sa kinabuhi nga nagka-arthritis, ug ania siya nga gusto mabautismohan kini sa Ngalan ni Ginoong Jesus, kay kana man ang agianan pasulod. Mao kana ang abli nga pultahan. Dinha kon diin giablihan ni Josue ang usa ka agianan nga patabok ngadto sa yutang saad. Wala’y duha o tulo ka dapit nga abli kaniadto; aduna lamang og usa.

177 Si Pedro, sa Adlaw sa Pentecostes, sa dihang ang Iglesia kaniadto unang nagsugod, nag-abli siya og usa ka agianan, miingon, “Maghinulsol ang matag usa kaninyo ug magpabautismo sa Ngalan ni Jesus Cristo.” Wala gayud sila sukad magbag-o gikan sa mao rang agianan, nakatabok gyud ang matag usa padulong sa Yutang saad.

178 Gisulayan sa pipila kanila nga motabok, agi niadtong ubang labanganan, ug si Pablo miingon kaniya, “Sa unsa man kamo nabautismohan? Asa ba diay mo nagasulay pagtabok?”

Ug miingon sila, “Didto sa kung asa si Juan mitan-aw.”

179 Miingon siya, “Bueno, gitudlo lamang ni Juan ang panahon, ug ang lugar.” Ug dayon sa dihang nadungog nila kini, gibautismohan sila didto hustong labanganan. Ug mitabok na sila, ug nadawat ang punoan nga Balaang Espiritu.

180 Itugot kini ngadto sa among igsoong babaye ug sa iyang mga minahal, sa Ngalan ni Jesus Cristo. Amen.

181 Igsoong Lyle. [Nagaingon si Igsoong Lyle, “Nagatoo ako nga ikaw gyud ang hustong lider, Igsoong Branham.”—Ed.] Oh, igsoon! [“Nagduol...?...Mahinumduman mo ba kung nahitabo ba gyud kadtong damgo, nga adunay miabot nga usa ka butang...?...Kung nahisgotan mo ang damgo, okay lang. Mao kana ang akong nadamgohan. Kon diin, kanunay kang nagadamgo og maayo!...?...”] Oo. Mora’g kanus-a lang kadto. [“Oo.”] Oo. Nalipay ako...?...Panalanginan ka sa Dios. Nagadulog ka na sa Yutang saad karon! Tingali mahisgotan ko kana.

182 Pila ba ang nakahinumdum niadtong bag-o pa lamang makumpirma kanako kining ministerio, ug nga ako namasol kauban sa usa ka tawo usa niana ka adlaw, didto sa usa ka suba, sa lanaw? Ug nagapamasol ako niadto og gagmay’ng isda, ug mikunsad kanako ang Balaang Espiritu. Adunay usa niadto ka...Kining lalaki usa ka Saksi ni Jehovah, kaniadto. Ang igsoon niyang lalaki ania dinhi sa kon asa man, si Banks Wood. Anaa lang siya dinha sa kon asa man, nga akong silingan.

183 Kini si Lyle. Ug kining mga tawhana mga Saksi ni Jehovah. Ug miingon sila, usa niana ka adlaw niadtong namasol kami didto, human nga nakabig kining lalaki, gisultihan nako siya nga adunay usa ka butang sa iyang kinabuhi, ug mahitungod sa kung unsa—unsang nahitabo, ug ang tanan nga bahin niini. Nga, karon lang niya gisulti sa ako, ug karon lang niya natangtang kini sa iyang kinabuhi, husto kana, kung unsa man kadto. Eksakto gyud kana. Ang papa niya ang mao’y—mao’y taga-basa sa simbahan. Ania ba si tatay karong gabhiona, Billy? [Adunay nag-ingon, “Wala ko kabalo.”—Ed.] Ug siya ug ang iyang asawa, parehong, nabautismohan na, para mahimong mga saksi sa Ngalan ni Jesus Cristo, didto sa bautimohan. Ug kining lalaki naglingkod sa akong tupad, usa niana ka adlaw.

184 Banks, asa man ka? Ania ba siya karong gabhiona? [Adunay nagaingon, “Atua mismo sa luyo sa suok didto.”—Ed.] Didto sa luyo sa suok. Oo.

185 Ug namasol kami niadto. Ug, ang igsoon, napatay man gud sa akong gamay’ng bata ang...Abi ko nga nakapatay siya niadto og gamay’ng iring, pipila pa lang ka adlaw sa wala pa kadto. Ang luoy namong inayang iring daghan man gud og mga gamay’ng anak, ug gipudyot niya kadtong usa ug gibundak. Nahunahuna ko...miingon ko, “Adunay gamay’ng kinabuhi nga pagabanhawon sa Ginoo,” usa ka adlaw sa wala pa



kadto. Husto ba kana, Lyle? [Nagaingon si Igsoong Lyle Wood, “Oo.”—Ed.] Atua kami niadto sa usa ka luuk. Ug miingon ko, “Kana ang MAO KINI ANG GINAINGON SA GINOO.” Ug namasol kami tibuok gabii ug wala gyu’y nakuha.

<sup>186</sup> Pagkasunod buntag, namasol na usab kami, balik niadtong gamay’ng luuk, para sa pipila ka bluegill. Usa kana ka gamay’ng isda. Ug adunay dakung tagdok igpamasol si Igsoong Lyle, ug gipasagdan niya ang usa ka gamay’ng bluegill nga lamyon kadto, ang daku nga taga nga gamit niya, hangtud, sa dihang birahon na niya kadto, kadtong nipis nga pisi nakakutay hangtud sa pinakasulod, sa tiyan sa gamay’ng bluegill, kadtong dakung tagâ. Ug sa dihang gibira na niya kadto pagawas, kinahanglan pa niyang birahon apil ang tinai ug tanan na gikan niadtong gamay’ng bluegill, para lang makuha kadto. Ug basta lang niya nga gibira kadto tanan, tungod kay atua man gud kadtong dakung tagâ sa pinakasulod sa tiyan sa isda. Ug sa dihang gibira niya, gilabog niya na lang kadto nga isda sa tubig. Ug mikirig kadto, sa makaupat o lima ka higayon, ug mao na kadto, tungod nga nabira man ang iyang tinai ug hasang pagawas sa iyang baba. Ug naglutawlutaw kini didto sa tubig mga katunga sa oras, naglutawlutaw padulong niadtong mga sagbot.

<sup>187</sup> Ug naglingkod ako didto, nga nagapamasol. Ug sa kalit lang, miabot ang Balaang Espiritu, miingon, “Magsulti ka sa nianang isda.”

<sup>188</sup> Miingon ko, “Gamay’ng isda, ginahatag pag-usab ni Jesus Cristo ang imong kinabuhi.” Ug kadtong gamay’ng isda, nga naglutawlutaw sa tubig nga patay na, mibali pabalik sa iyang hustong posisyon, ug dayon nag-rrrroot, pailalum didto sa tubig, sa ingon ka paspas nga mahimo niya.

<sup>189</sup> Atua mismo sila Igsoong Lyle ug Igsoong Wood. Miingon si Igsoong Lyle, “Igsoong Branham, para gyud kana sa ako, tungod kay giingon ko sa gamay’ng . . .”

<sup>190</sup> Karong gabhiona, mahimo ba nako isulti kanila ang giingon mo? [Nagaingon si Igsoong Lyle, “Puede kaayo. Okey ra, Igsoong Branham.”—Ed.]

<sup>191</sup> Miingon siya, sa dihang gibira niya kadtong tinai gikan sa maong isda, dayon gilabog niya kini didto, miingon, “Naikapay mo na ang katapusan mong pagkapay, gamay’ng isda,” nga ingon niana lang. Gilabog dayon kini.

Miingon siya, “Kini—ako man gud ang buut ipasabot niini.”

Ug miingon ko, “Dili, Igsoong Lyle. Dili kadto ingon niana.”

<sup>192</sup> Si Igsoong Banks nga atua sa luyo, miingon, “Pila kaha ka mga tawo niining kalibutan, pila kaha ka linibo, ang gustong maanaa kon asa kita nagatindog karon mismo, aron lang nga makita ang gahum sa Dios nga mikanaug ug nagbuhat sa ingon nianang butang!” Sa laing pagkasulti, gusto niyang . . .

<sup>193</sup> Nagatoo ko nga nabati nato tanan ang sama nga gibati ni Pedro kaniadto, “Maayo nga nakaanhi ako dinhi. Magpatindog kita og tulo ka tabernakulo.” Kita n’yo? Husto kana.

<sup>194</sup> Karon, Igsoong Lyle, gidihogan ka na sa Balaang Espiritu karon. Nakabiya ka na sa Egipto. Gibiyaan mo na ang mga kulon sa ahos ug ang kahugawan sa kalibutan. Nagatindog ka na karon sa tampi sa Jordan, nga didto na mismo patabok. Itabok ka unta didto sa Dios; Lyle.

<sup>195</sup> Makagagahum nga Dios, ania ang Imong tropeo. Tinuod nga atua siya kaniadto sa usa ka grabeng kahimtang, Ginoo, pero ang akong kasingkasing nahinangop kaniya. Napugngan sa among mga pag-ampo kadto mismong makahahadlok nga panghitabo unta kaniya didto, ug ang mismong butang nga migapos kaniya nawagtang na kaniya. Gidugmok na kini. Ug karon nagalakaw na siya padulong sa Jordan. Dalha siya sa Yutang saad, Ginoo. Ug selyohi siya taliwala sa mga tawo. Aron, sa nianang mahimayaong Adlaw sa dihang magkitaay na kami didto, hinaut nga mabati nako ang gaku sa iyang mga kamot, nga nagasinggit, “Bililhon kong igsoong lalaki!” “Naila ko Siya.” Dad-a si Banks uban kaniya, Ginoo, mahimo ba Nimo? Si papa ug mama, ug ang tanan kanila, ang igsoong babaye, ug ang tibuk nianang dakung pamilya, hinaut magkitaay kami didto, Ginoo, ug ang matag usa kanila mapuno sa Espiritu Santo. Ginapangamuyo ko sa Ngalan ni Jesus. Amen.

Madawat mo gayud Kini, igsoon. Panalanginan ka sa Dios, Igsoong Lyle.

<sup>196</sup> [Adunay nagaingon, “Igsoon?”—Ed.] Oo, igsoon. [“Adunay tawag sa telepono nga gikan pa sa halayo, ug usa ka naghimalatyon na, anaa naghulat sa linya.”]

<sup>197</sup> Adunay usa ka naghimalatyon, sa usa ka tawag nga gikan pa sa halayo. Ug ihatag ko ang panerbisyo kang Igsoong Neville samtang adtoon nako didto.

<sup>198</sup> [Nagaingon si Igsoong Neville, “Daku ug makahibulong gayud nga adlaw diha sa Ginoo! Nagbuhat ang Dios og pipila ka makahibulong nga mga butang para kanato karon. Ang akong mga gipaabot nangatuman tanan—Ed.]

[“Manindog kitang tanan, palihog.]

<sup>199</sup> [“Hinumdumi ninyo ang panerbisyo kung ingon niana, sa Miyerkules sa gabii. Mag-ampo pa kamo. Ang tanang wala-matagbaw, dili-siguradong mga kasingkasing makapagkontak gayud sa Dios. ‘Haduol na ang panahon. Karon na ang panahon. Karon mao mismo ang adlaw sa kaluwasan.’]

<sup>200</sup> [“Panalanginan sa Dios ang matag usa kaninyong mga bisita, kamong mga taga-lagyo pa. Ang among pag-ampo nga hatagan kamo sa Dios og panalangin sa pagbiyahe, pabalik sa inyong mga puloy-anan. Maanindot gayud nga nakauban namo kamo.

Ug iampo ninyo kami sa inyong pagpauli, nga panalanginan sa Dios kining lugara, usab.]

201 [“Amahan namong Langitnon, ingon nga ang Imong alagad mianhi karong gabhiona, para buhaton ang buluhaton sa Imong alagad ug manalagna, nga nagatindog taliwala, sa gintang, nga ginalig-on kuta, mianhi kanamo nga may nagadilaab nga gugma sa Imong alagad, ingon nga nabautismohan sa Espiritu Santo, ug gihatagan og katungdanan nga iya sa manalagna, para mamulong sa niining henerasyon. Tabangi kami karong adlaw ug karong gabhiona, nga dawaton ang Mensahe nga miabot kanamo, Ginoo, ang mga pahamatngon, aron nga mamahimong andam.]

202 [“Panalangini ang matag usa nga mogawas gikan sa mga pultahan niining bilding karong gabhiona. Hinaut nga ang mga sakit nga anaa kanamo, nga wala namo nahibal-an, hinaut nga ang Imong mapanalanginong grasya ug gahum pagatipigan ug protektahan ug pagaayohon kami, ug pagaampingan kami, hangtud sa nianang oras kon diin ibalhin Mo na kami ngadto sa pikas bahin. Panalangini ang tanan nga mga naminghoy ug mga napalaw, ang mga nahadlok, ug kadtong mga mahuyang.]

203 [“Dios, nagaampo kami karong gabhiona para sa usa ka espesyal nga pagduaw, ang mga panalangin sa Espiritu Santo, nga magauban sa matag magbiyahe, sa matag magpapanaw, matag estranghero sa among mga pultahan. Ang matag usa nga mogawas sa maong pultahan karong gabhiona, hinaut nga ang tabil nga pangtabon sa Dugo, nga gikan sa krus sa Kalbaryo, igong magatabon ug magsangkap.]

204 [“Ayoha kami sa dihang masakit kami. Ampingi kami sa Imong gamhanang gahum. Dihogi kami aron makapangalagad. Tugoti kaming magalakaw kami diha sa gugma, sa Imong atubangan, sa tanang mga adlaw sa among kinabuhi. Ug magadayeg kami Kanimong tungod niini, kay ginapangamuyo namo kini sa Ngalan ni Jesus Cristo ug alang Kaniya. Amen.]

205 [“Ug panalanginan kamo sa Dios. Ug malipayon kami nga nakauban kamo. Maglamano hay sa usa’g usa.”—Ed.]

206 Nagapasalamat gayud ako sa tanan ninyong gibuhay para sa ako, ang kard ug...?..Oo, sir. Nagapasalamat gayud ako...?..

207 Busa gipadala na nato ang bato sa pagtoo...?.. Adunay usa ka lalaki nga taga...?.. Busa nagpadala ako og pag-ampo sa iya, sa Ngalan ni Jesus Cristo. Naghigda siya didto mga usa ka oras, nga wala na’y pulso, wala na’y ginhawa, wala na’y bisan unsa. Wala na’y ginhawa, wala na’y pulso, o pagginhawa, wala na’y bisan unsa; misulirap na ang iyang mata, nga natumba diha sa pulpito. [Nagaingon si Igsoong Neville, “Gipasagdan lang usá sa babaye nga nakahigda kini didto hangtud nga miabot ang pag-ampo.”—Ed.]

<sup>208</sup> Gaandar pa ba gihapon *kini*? [Nagaingon si Igsoong Neville, “Oo, nakaabli pa gihapon kana.”—Ed.]

<sup>209</sup> Mahimo ko bang makuha ang inyong pagtagad? Didto sa halayo, dunay usa ka batan-on pa nga ebanghelista, usa ka magwawali, nga taga-dinhi sa Indiana, ang nagwali kaganina, natumba patay diha sa pulpito, mga usa pa lang ka oras ang milabay. Samtang nagwali siya, paatubang nga natumba, ug namatay diha sa pulpito, usa ka inila nga ebanghelista, nga nagawali dinhi sa Indiana. Bag-o lang ning-anhi ang pastor ug gitawgan ako. Namatay siya mismo samtang nagawali ilalum sa dihog sa Espiritu, paatubang nga natumba, nagsulirap ang iyang mga mata, wala na siya magginhawa. Gidiklarar na siyang patay, naghigda didto nga patay na sa mga usa ka oras. Ug adunay nagsulti kanila nga tawagan ang simbahan ug ipapangamuyo kanako. Busa nagpadala ako og pag-ampo para mapahibalik siya, sa Ngalan ni Ginoong Jesus. Unta moapil kamo kanako pinaagi sa pagtoo, nga dili gyud niini masipyat ang puntirya, nga pukawon siya ug buhion siya pag-usab. Salamat.

<sup>210</sup> Ang Dios magauban kaninyo, hangtud nga makita ko kamo sa Miyerkules sa gabii. Kamong mga taga-Georgia ug sa palibot, babay. Ang Dios magauban kaninyo.

<sup>211</sup> Igsoong Pat . . . ? . . .



*PAGSAGOP 1* CEB60-0515E

(Adoption 1)

SERYE SA PAGSAGOP

Kining Mensahe ni Igsoong William Marrion Branham, una giwali sa Ingles niadtong Domingo sa gabii, Mayo 15, 1960, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)